

# DIZRA' CHAWE' CA NACA CHEE JESUCRISTO DA BZUAJ SAN MARCOS

---

Da bchalaj Juan, benne' bchue' bénneache nisa

(Mt. 3.1-12; Lc. 3.1-9, 15-17; Jn. 1.19-28)

**1** <sup>1</sup>Caní guzú lau dizra' chawe' ca naca chee Jesucristo,  
Zri'ine Dios.

<sup>2</sup>Bzrin lazre' da bzuaj Isaías, benne' bchálaje' waláz chee  
Dios, ca da gunná Dios:

¡Le nna'xque nigá!

Neda' dxesel-la' benne' gubáz chia', benne' cuía lawe' lau  
Lue'.

Bénnea' gupé'le neza naga teu' chee ilúnbe'e bénneache  
Lue'.

<sup>3</sup>Welénqueze chi'i benne' dxebezre xé'le le'le xixre' lawe' lataj.

Dxenné': "Le gupá'a neza naga te Xránadxu lu xichaj  
láZRdaule.

Le xebéaj li neza lase chee' ca'."

<sup>4</sup>Caní guca lawe' da bla' Juan le'le xixre' lawe' lataj, na'  
bchálaje' dizra' chee Dios, ne gunné' dxal-la' xeledxúa  
bénneache nisa, na' bchue' le' nisa, benne' ca' belexebí'i  
lazre' chee gunite lau Dios dul-la da zaj nabague'. <sup>5</sup>Ca'an  
guca, guledxúaj bénneache zan lu xezre Jerusalén, ne  
xúgute xezre ca' zaj nababa Judea, na' xjaque' naga  
zua Juan, na' Juan nigá bchue' benne' ca' nisa lu xegu  
Jordán, benne' ca' gulexrúalepe' dul-la da zaj nabague'.

<sup>6</sup>Caní guca zra lana Juan. Gucue' zra lane' ladxe' xicha zra  
camello, bia dxelebía bénneache, ne tu xpádxue' xide bchela

le'e. Dxawe' biche xuaj, ne dxé'aje' bzrina'dau' chee bézudau'.

<sup>7</sup>Ca dxuchálaje' dizra' chee Dios, dxenné':

—Gate te chia' neda', na' xida xetú benne', bènnea' nápaxé' xel-la dxenná bea ca neda'. Quebe naca chia' xáchua' chee lechja' zrele'. <sup>8</sup>Da lítega, neda' bchua' le'e nisa. Le' gune' da zéaje' xel-la dxedxúa nisa nigá, guzúe' Be' Lá'azxa lu xichaj lázrdaule.

### Ca da guca gate gudxúa Jesús nisa

(Mt. 3.13-17; Lc. 3.21-22)

<sup>9</sup>Ca da guca lu zra ca', guzá' Jesús lu xezre Nazaret chee ga nababa Galilea, na' bzrine' lau Juan. Juan nigá bchue' Jesús nisa lu xegu Jordán. <sup>10</sup>Gate bdxuaj Jesús lu nisa, la blé'etene' naxalaj xabáa, ne blé'ene' betaj Be' Lá'azxa. Dxul'é lawe' ca tu bgúgudu chiche, na' bzrine' ca li xichaj Jesús. <sup>11</sup>Ben tu chí'i da za xabáa, da dxenná na:

—Lue' nacu' Zri'ina'. Nazrí'ida' Lue', ne dxezaca ba lázreleda' Lue'.

### Dxaca lazre' Satanás da xriwe' gun ga бага Jesús dul-la

(Mt. 4.1-11; Lc. 4.1-13)

<sup>12</sup>Nadxa Be' Lá'azxa guché'e Jesús le'e xixre' lawe' lataj. <sup>13</sup>Guzúa Jesús le'e xixre' lawe' lataj chua zra chua xela. Na' bzin Satanás da xriwe', ne guca lazre' na gun na бага Jesús dul-la. Guzúa Jesús naga zaj zra' be xixre' be snia, na' gubáz chee xabáa chee Dios gulácalene' Jesús.

### Jesús dxezú lawe' dxusédené' bènneache

(Mt. 4.12-17; Lc. 4.14-15)

<sup>14</sup>Ca gudé guxú'u Juan lizre xia, na' bzin Jesús lu xezre ca' zaj nababa Galilea, ne dxuchálajlene' bènneache dizra' chawe' ca dxenná bea Dios. <sup>15</sup>Gunná Jesús:

—Ba bzin zra. Ba zua báguze gate nna bea Dios xezr la xu nigá. Chee le' na', le xebí'i lazre', ne le cheajlí lazre' dizra' chawe' nigá.

### Dxenné Jesús tapa benne' wezén bela chee xelaque Le' tuze

(Mt. 4.18-22; Lc. 5.1-11)

<sup>16</sup>Gate gudá Jesús dxu'a nísadau' chee Galilea, na' blé'ene' Simón, ne Andrés, biche Simón na'. Benne' caní dxuluzale'

xixruj bela chee' lu nísadau' lawe' da zaj naque' wezén bela.

<sup>17</sup>Na' gunná Jesús:

—Le gun neda' tuze, na' guzúa' le'e gácale wən zrin chia'.  
Cheajxrile bėnneache ca dxunle dxezenle bela.

<sup>18</sup>La bulucá'anate' xixruj chee' ca', na' zjácálene' Jesús.

<sup>19</sup>Nadxa gudé Jesús xelate' ca na'la, na' blé'ene' Jacobo, ne Juan, benne' ca' zaj naque' zri'ine Zebedeo. Zaj zre'e lu da dxedá lawe' nísadau', dxelexexune' xixruj bela chee' ca'. <sup>20</sup>Ca gunné Jesús Jacobo, ne Juan, na' la bulucá'anate' xre' Zebedeo ne wən zrin chie' ca' zaj zre'e lu da dxedá lawe' nísadau', na' zjácálene' Jesús.

### **Tu benne' xu'e be' xriwe'**

(Lc. 4.31-37)

<sup>21</sup>Gate gul-la na gulu'e lu xezre Capernaum, na' gate bzrin zra dxulupá'ana benne' judío ca', guxú'u Jesús lu xu'u naga dxelúe lá'ana judío ca' Dios, ne bsédené' benne' ca' zaj zre'e na'. <sup>22</sup>Belexebánene' ca naca da dxusede Jesús le' lawe' da dxuchálaje' nen duté xel-la dxenná bea, ne quegá ca dxuluchalaj benne' ca' dxuluxuzájle'e da nadxixruj bea Dios. <sup>23</sup>Nadxa bla' tu benne' xu'e be' xriwe' lu xu'u na', na' gudxezre xa'a na lu dxu'a bėnnea'. <sup>24</sup>Gunná na:

—¿Bizra nápantu' chiu', Jesús, benne' Nazaret? ¿Za'u guzría xi'u netu'? Ba nézquezda' nu nacu'. Benne' Lá'azxa chee Dios nacu'.

<sup>25</sup>Jesús gudil-le' na, gunné':

—Zrize guzúa. Bedxúaj lu bel-la' dxen chee benne' nigá.

<sup>26</sup>Nadxa be' xriwe' na' bxrízele'e na bėnnea', ne gudxezre xá'ale'e na, na' bedxúaj na. <sup>27</sup>Belexebánele'e xúgute benne' zaj zre'e na', dxelé ljwezre':

—¿Bizra dizra' cube da nigá? Dute xel-la dxenná bea chee' dxenná be'ene' be' xriwe' ca', na' dxuluzúa na dizra' chee'.

<sup>28</sup>La bzrílujte dizra' chee xel-la waca chee Jesús du ca naca xezre ca' zaj nababa Galilea.

### **Jesús dxexune' xrna' zru'ula Pedro**

(Mt. 8.14-15; Lc. 4.38-39)

<sup>29</sup>Ca belexedxúaje' lu xu'u na' chee judío ca', na' belezrine' lizre Simón, ne Andrés. Jacobo ne Juan dxelune' Jesús tu zren. <sup>30</sup>Lu xu'u na' de xrna' zru'ula Simón, xu'e da la. La

buluchálajl̥te' Jesús ca dxaca chee nu'ula nigá. <sup>31</sup>L̥e' la b̥x̥rute' ne'e, bechise' l̥e'. La bedxúaj̥te da la da xu'e, na' bseni'e da gulawe'.

**Jesús dxexun̥e' b̥enneache zan**

(Mt. 8.16-17; Lc. 4.40-41)

<sup>32</sup>Ca gula guzré zra na', ca guzría gubizra, na' guleché'e xúgute benne' we' lau Jesús, ne benne' ca' zaj xu'e be' xriwe'.

<sup>33</sup>Ca naca benne' xezre gulebigue' dxa xu'u naga zua Jesús.

<sup>34</sup>Jesús bexune' zánete benne' we' ca zaj naca xízrawe' da xu'u tu tu̥e', ne bebéaj̥e' zane' be' xriwe' zaj xu'u b̥enneache ca'. Quebe be'e lataj be' xriwe' ca' xelenné na lawe' da zaj núnbea na Le'.

**Dxuchalaj Jesús lau b̥enneache zaj zre'e Galilea**

(Lc. 4.42-44)

<sup>35</sup>Ca bebán Jesús bál-lala, ne nachúl-late, bedxúaj̥e' guz'é'e zéaj̥e' tu lataj naga nadache' b̥enneache, na' bchálajl̥ene' Dios.

<sup>36</sup>Simón Pedro, ne benne' ca' zaj zrálene' l̥e' belexexílaj̥e' Jesús.

<sup>37</sup>Ca xejlexraque' Jesús, na' gul'é'e L̥e':

—Xúgute b̥enneache dxexexílaj̥e' Lue'.

<sup>38</sup>Na' gunná Jesús:

—Chéajdxu xezre walizre ca' chee guchálajl̥ena' benne' ca' xrtizra Dios. Chee l̥e na' belja'.

<sup>39</sup>Lu xu'u ca' naga dxelúe lá'ana judío ca' Dios, da ca' zaj zua tu tu xezre ca' chee ga nababa Galilea, bchalaj Jesús dizra' chee Dios, ne bebéaj̥e' xízrawe' xriwe' ca' da zaj xu'u benne' we' ca'.

**Jesús dxexun̥e' tu benne' dxé'ene' xízrawe' guzru'**

(Mt. 8.1-4; Lc. 5.12-16)

<sup>40</sup>Nadxa bzin lau Jesús tu benne' dxé'ene' xízrawe' guzru', na' bzu zribe', ne guta' xuene' L̥e', dxenné':

—Che Lue' dxaca lazru', waca xexunu' neda'.

<sup>41</sup>Jesús bexache lazre' l̥e', na' bli ne'e, gudane' l̥e'. Dxenné':

—Dxaca lazra'. Na'a dxexacu'.

<sup>42</sup>Ca gunné' caní, la becuásate xízrawe' na', na' begá'ane' chawe'. <sup>43</sup>Nadxa Jesús bsízrene' l̥e', na' besel-l̥e' l̥e'. <sup>44</sup>Caní gunné':

—Quebe nu xu'u ca da guca chiu'. Guxíaj lau bxruze xejl'é'e cuinu', ne bnezruj ca naca da gunná be'e Moisés xelún

benne' ca' xelexexaque'. Caní gunu' chee xeledé'ene' ba bexacu' na'a.

<sup>45</sup>Nadxa benne' nigá, ca bezé'e, guzú lawe' dxuchálajlene' tu tu benne' ca guca chee' bexaque'. Ca'an guca, québedxa guca chu'u Jesús zaca bal-la lau lu xezre. Begá'ane' le'e xixre' lawe' lataj. Bénneache chee xúgute xezre ca' belezrine' lau Jesús naga zué'.

**Jesús dxexune' tu benne' quebe gaca se'e**

(Mt. 9.1-8; Lc. 5.17-26)

**2** <sup>1</sup>Ca gudé chupa chunna zra, na' guxú'u Jesús xecha lasa lu xezre Capernaum. Belénne bénneache zua Jesús tu lu xu'u. <sup>2</sup>La belezragate benne' zante naga zua Jesús. Ca'an guca, québedxa guque lu xu'u, ne dxa xu'u. Bchalaj Jesús xrtizra Dios. <sup>3</sup>Na' belezrín tapa benne' lu xu'u naga zua Jesús, zaj nu'e tu benne' quebe gaca se'e. <sup>4</sup>Lawe' da quebe gulezéquene' xelezrine' lau Jesús, lawe' da zaj zra' bénneache zante ga na', na' gulesáluje' chju'u chee xu'u naga zua Jesús. Na' bululétaje' da'a da zrua benne' na' quebe gaca se'e. <sup>5</sup>Lawe' da dxeque be'e Jesús ca dxeleajlí lazre' benne' ca' Le', na' gunné', dxé'e bénnea' quebe gaca se'e:

—Zrí'ina'dau', ba nanite lau dul-la da nabagu'.

<sup>6</sup>Zaj dxé'e bal-la benne' ga na', benne' dxuluxuzájlé'e da nadxixruj bea Dios, na' gulenné lanze': <sup>7</sup>—¿Bizr chee na' dxuchalaj caní benne' nigá? Dxucá'ana díraje' Xránadxu Dios. ¿Núzraqueze gaca gunite lau dul-la da zaj nabaga bénneache? Tuze Dios na'. <sup>8</sup>Dxeque be'e Jesús lu lázrdawe' ca dxelenné lane' chee', na' gunné':

—¿Bizr chee na' dxéquele caní? <sup>9</sup>¿Bizra dizra' quebe naca na stébela xapa' benne' nigá quebe gaca se'e? ¿Naca na stébe xapa' le', ba nanite lau dul-la nabagu'? Cabí. ¿U che stébe xapa' le', bexasa, becá'a da denu', ne bexíaj? <sup>10</sup>Na'a, chee nézele le'e neda', Benne' Gulje' Bénneache, napa' xel-la dxenná bea lu xezre la xu gunite lawa' dul-la da zaj nabaga bénneache.

Na' gunná Jesús, dxé'e bénnea'.

<sup>11</sup>—Lue' dxapa', bexasa, becá'a da'a chiu', ne bexíaj lizru'.

<sup>12</sup>Ca'an guca, la bexásate', na' bequé'e da'a chee', ne bedxúaje' lau xúgute bénneache. Ca'an guca, xúgute benne' ca' belexebánene', na' belúe lá'ane' Xránadxu Dios. Dxelenné':

—Cabata' ne lé'edxu gaca na ca guca da nigá.

**Dxenné Jesús benne' le' Leví***(Mt. 9.9-13; Lc. 5.27-32)*

<sup>13</sup>Ca gudé na' bedxúaj Jesús zéajé' dxu'a nísadau', na' xúgute bēneache lu xezre ca' belezrine' lau Le'. Nadxa bsédene' benne' ca' xrtizra Dios. <sup>14</sup>Ca gudé Jesús na', ble'ene' Leví, zri'ine Alfeo, dxe'e lataj chee wechizruj. Na' gunná Jesús, dxe'e le':

—Ben neda' tuze.

La guxásate Leví, guxíajlene' Jesús.

<sup>15</sup>Ca' guca, gate gudxé' Jesús dxawe' lizre Leví, na' zánete benne' wechizruj, ne benne' dul-la ca' gulebé'e dxelágulene' tu zren nen Jesús, ne benne' ca' dxusédene'. Caní naca lawe' da zjácale benne' zante Jesús. <sup>16</sup>Nadxa benne' ca' dxuluxuzájle'e da nadxixruj bea Dios, ne benne' fariseo ca', gate belelé'ene' ca da dxun Jesús, dxágulene' benne' wechizruj ca', ne benne' dul-la ca', na' gulenné', dxelé'e benne' ca' dxusede Jesús:

—¿Bizra da nigá? Dxagu dxé'ajlene' benne' wechizruj ca', ne benne' dul-la ca'.

<sup>17</sup>Ca ben Jesús da nigá, gunné':

—Benne' chawe' ca' quebe dxelechínene' benne' dxexún bēneache. Benne' we' ca' dxelechínene' bēnea'. Quegá bla'a dxennéa' benne' xrlátaje ca'. Benne' dul-la ca' dxennéa'.

**Ca dxal-la' xelún bēneache gate dxelune' gubasa***(Mt. 9.14-17; Lc. 5.33-39)*

<sup>18</sup>Ca guca lu zra na', belún gubasa benne' ca' dxusede Juan, ne benne' ca' dxulusede benne' fariseo ca'. Na' belezrín benne' ca', bedajleguezre' Jesús:

—¿Bizr chee na' dxelún gubasa benne' ca' dxusede Juan, ne benne' ca' dxulusede benne' fariseo ca', na' benne' ca' dxusédenu' Lue' quebe dxelune' gubasa? ¿Bizr chee na'?

<sup>19</sup>Na' Jesús guzre' benne' ca':

—¿Waca xelún gubasa benne' zaj zre'e laní chee wechaga na' dxácate na' zua benne' wechaga na' nen le'? Dxácate na' zua wechaga na' nen le' quebe gaca xelune' gubasa. <sup>20</sup>Wazrín tu zra gate dua benne' wechaga na'. Lu zra na' xelune' gubasa.

<sup>21</sup>'Quegá nu benne' xudé'e tu ladxe' cube le'e zradxu gula. Che ca'an gune', ladxe' cube da xudé'e wazrube xu na da gula, na' wachézadxa na. <sup>22</sup>Cá'anqueze, quegá nu benne' que'e xrise

uva wal-la cube lu bzude xide gula. Che ca'an gunē', na' xrise uva wal-la cube na' wacheza na bzude xide gula, na' walalaj xrise uva wal-la, ne cuía xi bzude xide na'. Xrise uva wal-la cube lu bzude xide cube dxal-la' chuzruj na.

**Benne' ca' dxusede Jesús dxelíchaje' dau chee zrua' xtila zra dxulupá'ana judío ca'**

(Mt. 12.1-8; Lc. 6.1-5)

<sup>23</sup>Gate gudé Jesús naga ze zrua' xtila zra dxulupá'ana benne' judío ca', ná'ate na' benne' ca' dxusede Jesús, ca' zaj xu'e neza, gulezú lawē' dxelíchaje' dau naga zria zrua' xtila.

<sup>24</sup>Nadxa benne' fariseo ca' gulé'e Jesús:

—Gunná'xque. ¿Bizr chee na' dxelune' zrin da quebe dxal-la' xelune' zra dxupá'anadxu?

<sup>25</sup>Jesús guzre' benne' ca':

—¿Cabata' ne gulábale ca da ben David gate gudune', ne bxáizrjene' da gagu le', ne da gugawe' benne' ca' zaj zralene' le'? <sup>26</sup>Guxú'e lu xu'u chee Dios gate naca Abiatar bxruze blau, na' David gudawe' xeta xtila da dxelu'e lau Dios, da quebe dxal-la' gagu benne' xula, san tuze bxruze ca' zaj naca chee' xelawe' na. Na' bnézrujte David da gulagu benne' ca' zralene' le' chee xeta xtila na'.

<sup>27</sup>Cá'anqueze gunná Jesús, dxē'e benne' ca':

—Dios gudíxruje' zra dxupá'anadxu chee gaca ba neza chee bénneache, quegá bene' bénneache chee xelune' zrin chee zra dxupá'anadxu. <sup>28</sup>Chee le' na', neda', Benne' Gulje' Bénneache, naca' xrane zra dxupá'anadxu.

**Ca guca chee tu benne' nazrinnaj ne'e**

(Mt. 12.9-14; Lc. 6.6-11)

**3** <sup>1</sup>Gate guxú'u Jesús da xula lu xu'u naga dxelúe lá'ana judío ca' Dios, ze tu benne' biu nazrinnaj ne'e ga na'.

<sup>2</sup>Judío ca' buluzuzre' Jesús che xexune' benne' we' nigá lu zra dxulupá'ane', chee xelezéquene' xelagu zria Jesús. <sup>3</sup>Nadxa gunná Jesús, dxē'e benne' biu na' nazrinnaj ne'e:

—Guxasa. Guzé laduj benne' caní.

<sup>4</sup>Nadxa gunaba Jesús lau judío ca', dxē'e le':

—¿Naca chee zra dxupá'anadxu gundxu da xrlátaje, u che gundxu da calela? ¿Waca gupá'adxu xel-la nabán chee nu benne', u che guzría xidxu xel-la nabán chee'?

Na' gulezúa zrize judío ca'. <sup>5</sup>Nadxa Jesús gunná zi'e benne' ca'. Bewí'inene' ca naca xel-la lázrdau zide' chee'. Nadxa guzre' benne' nazrinnaj ne'e:

—Guchiluj na'u.

Guchiluj ne'e, na' bexaca na. <sup>6</sup>Ca'an guca, belexedxúaj benne' fariseo ca', na' belune' xel-la wezría nen benne' ca' zaj de'e Herodes ájala xelúti'e Jesús.

### Bénneache zan dxelezagüe' dxu'a nísadau'

<sup>7</sup>Nadxa gucuasa Jesús laduj benne' ca', na' guxíaje' dxu'a nísadau' nen benne' ca' dxusédene'. Zjácale' benne' zan ca' Jesús, benne' chee' xezre ca' zaj nababa Galilea. <sup>8</sup>Gate belén bénneache ca naca da zren ca' da dxun Jesús, belezrín benne' zan lau Le', benne' chee' xezre ca' zaj nababa Judea, ne benne' xezre Jerusalén, ne benne' chee' xezre ca' zaj nababa Idumea, ne benne' gusá'aque' xechalá'a xegu Jordán, ne benne' gusá'aque' xezre ca' zaj naxečaj na xezre Tiro, ne xezre Sidón. <sup>9</sup>Chee' le' na' gunná be'e Jesús benne' ca' dxusédene' xulucueze' tu da dxedá lawe' nísadau' checa xuluchide' bénneache zan Le'. <sup>10</sup>Caní guca lawe' da bexún Jesús benne' zante, na' benne' we' ca' gulebigüe' lau le' chee' cheajleté' Le'. <sup>11</sup>Gate be' xriwe' ca' zaj xu'u bénneache belelé'e na Jesús, na' buluzú zribe na lau Le', ne gulebezre xa'a na. Dxeleenná na:

—Lue' nacu' Zri'ine Dios.

<sup>12</sup>Jesús gudil-le' be' xriwe' ca' chee' quebe xululé'e na da naca Le'.

### Jesús dxenné' chazrinnu gubáz chee'

(Mt. 10.1-4; Lc. 6.12-16)

<sup>13</sup>Ca' gudé na' guluén Jesús tu lu xi'a, na' gunné' benne' ca' guca lazre'. Na' gulebigüe' lau Le'. <sup>14</sup>Bchague' chazrinnu benne' xelune' Le' tuze, benne' sel-le' cheajlechálaje' xrtizra Dios. <sup>15</sup>Bzue' lu na' benne' caní xel-la dxenná bea chee' xelexexune' benne' we' ca', ne chee' xelexebéaje' be' xriwe' ca' lu bel-la' dxen chee' bénneache ca'. <sup>16</sup>Benne' chazrinnu caní zaj le':

Simón, bénnea' bzua Jesús xetú le' Pedro,

<sup>17</sup>ne Jacobo ne Juan, biche Jacobo, benne' ca' zaj naque' zri'ine Zebedeo. (Benne' chupa caní bzua Jesús le' Boanerges, da zéaje' na benne' wal-la ca' guziu'.)

<sup>18</sup>Bchague' Andrés ne Felipe, ne Bartolomé, ne Mateo,



ne Tomás, ne Jacobo zri'ine Alfeo, ne Tadeo,  
 ne Simón, benne' dxue lázrele'e chee lazrie',  
 19 ne Judas Iscariote, bënnea' xudé'e Jesús lu na' benne' ca'  
 dxeledábage' Le'.

**Nu benne' dxenné' schanni' chee Be' Lá'azxa**

(Mt. 12.22-32; Lc. 11.14-23; 12.10)

Ca gudé na' bzrin Jesús tu lu xu'u nen benne' ca' dxusédene'.  
 20 Xecha lasa gulebige bënneache zan naga zua Jesús, na'  
 québedxa dxaca lataj xelawe'. 21 Gate belene benne' xrtia Jesús  
 ca da dxun Le', na' belezrine' chee xelexeché'e le'. Dxelenné':  
 —Quebe zua xrlátaje xichaj lázrdawe'.

22 Cá'anqueze benne' ca' dxuluxuzájle'e da nadxixruj bea  
 Dios, benne' gusá'aque' Jerusalén, dxeleñé':

—Benne' nigá zrague' Beelzebú, xrane be' xriwe' ca', na' ne  
 chee xrane be' xriwe' ca' dxebéaje' be' xriwe' ca'.

23 Nadxa gunné Jesús benne' ca', na' bchálajlene' le' tu da  
 dxulé'e na. Dxenñé':

—¿Wazeque Satanás da xriwe' xebéaj cuine na? 24 Che  
 benne' dxeleñná bea xelexaque' chupa la'a, quebe díaqueze  
 xel-la dxenná bea chee'. 25 Cá'anqueze che benne' zaj zre'e tu lu  
 xu'u xelaque' chupa la'a, quebe xeledíaqueze benne' zaj zre'e lu  
 xu'u na'. 26 Cá'anqueze, che Satanás tábaga cuínaqueze na, ne  
 xexaca na chupa la'a, quebe díaqueze na. Wadéqueze chee na.

27 'Quebe nu seque chu'u lizre benne' wal-la chee cuane' da  
 de chee' che quebe guchéaje' le' nédxula. Nadxa seque' cuane'  
 da de lizre benne' wal-la na'.

28 'Da li dxennía', dxapa' le'e: Xúgute dul-la da dxelún  
 bënneache, ne dizra' schanni' da dxeleñé', ájateze zaj naca  
 na, gunite láuqueze Dios chee'. 29 Na'a, ca naca nüteteze benne'  
 nne' schanni' chee Be' Lá'azxa, cabata' gunite lau Dios chee  
 bënnea'. Webía xí'queze'.

30 Caní gunná Jesús lawe' da dxeleñé':

—Zraga Jesús da xriwe'.

**Nu naca ca xrna Jesús, ne bi biche' ca'**

(Mt. 12.46-50; Lc. 8.19-21)

31 Ca gudé na' bzrin xrna Jesús nen bi biche' ca'. Gulebeze'  
 chalé'ajla, na' gulesel-le' tu benne' nne' Jesús. 32 Benne' ca' zaj  
 zre'e cuita Jesús gulé'e le':

—Xrna'u ne bi bichu' ca' zaj ze' chalé'ajla, dxelenné' Lue'.

<sup>33</sup>Gunná Jesús, dxé'e benne' ca':

—Nézele nuzra na' xrna'a, ne bi bicha' ca'?

<sup>34</sup>Nadxa gunná' Jesús benne' ca' zaj zre'e cuita Le', na' gunné':

—Benne' caní zaj zrálene' neda' nigá zaj naque' ca xrnáqueza', ne bi bicha' ca'. <sup>35</sup>Caní naca na lawe' da xúgute benne' dxelune' ca da dxaca lazre' Dios, benne' caní zaj naque' bi bicha' ca', ne bi zana' ca', ne xrna'a.

### Da dxulé'e na ca naca chee benne' dxaza dxa'ana

(Mt. 13.1-23; Lc. 8.4-15)

**4** <sup>1</sup>Xetú lasa guzú lau Jesús dxusédené' benne' ca' dxu'a nísadau', na' belezraga bénneache zante naga zue'. Naxánle'e benne', na' ben na ba xen guxú'u Jesús tu lu da dxedá lawe' nísadau' da dxé na', na' gudxé'e lu'uule da dxedá lawe' nísadau', na' bénneache zan ca' gulezré'e dxu'a nísadau'.

<sup>2</sup>Nadxa bchalaj Jesús da dxululé'e na, na' bsédené' benne' ca' da zante. Ca dxusédené' benne' ca', na' bchálaje' caní:

<sup>3</sup>—Le xene da nigá. Tu benne' dxaza dxa'ana zéaje' guza.

<sup>4</sup>Ca zéaje' dxaze', na' xeajlechaze bal-la binnedu ca' dxu'a neza. Na' belezrín bxinne, ne guláguba' binnedu caní. <sup>5</sup>Xezícadxa binnedu ca' xeajlechaze na lu xiaj naga quebe déteca xu. Binnedu caní belezría na lawe' da quebe déteca xu. <sup>6</sup>Ca bdxuaj gubizra, na' bzezxe na le na, na' lawe' da quebe zaj nun lue na lu da situj, gulebizre na. <sup>7</sup>Xezícadxa binnedu ca' xeajlechaze na naga dxelezría xixre' xeche'. Xixre' xeche' caní gulegúladxa na ca le na, na' bululule na le na, na' quebe gulebía na da gágudxu. <sup>8</sup>Xezícadxa binnedu ca' xeajlechaze na lu xu bebe. Belezría na cháwedau', na' belegula na, ne gulezríale'e na da gágudxu. Bal-la na gulebía na chi dxua tu tu na. Xebal-la na gulebía na ga xun tu tu na. Xebal-la na gulebía na tu gaxúa tu tu na.

<sup>9</sup>Gunnadxa Jesús, dxé'e benne' ca':

—Che nu benne' zua nague', dxal-la' xenne' da nigá.

<sup>10</sup>Ca gudé na', ca gucuasa Jesús cuita benne' zan ca', na' gulenaba benne' ca' zrálene' benne' ca' dxuséde Jesús bi zéaje ca naca da dxulé'e nigá. <sup>11</sup>Na' gunná Jesús, dxé'e benne' ca':

—Dios dxunne' le'e lataj nézele ca naca chee da nagache chee da dxenná bea Le'. Na'a, ca naca chee benne' ca' zaj zre'e cúzrela,

dxuchálajl̥na' l̥e' dízra'ze da dxulé'e na. <sup>12</sup>Caní dxuna' lawe' da dxelenné'e, na' quebe dxelaca lazre' xelélé'ene'. Dxelenne', na' quebe dxelaca lazre' xeléajni'ine', chee quebe xelexebí'i lazre', na' chu'u xel-la wenite lau chee dul-la da za nabague'.

<sup>13</sup>Na' gunnadx̥a Jesús:

—¿Quebe dxéajni'ile ca naca da dxulé'e nigá? ¿Ájalaqueze chéajni'ile xezícadxa dizra' ca' da dxululé'e na? <sup>14</sup>Benne' dxaza dxá'ane' naque' benne' dxuchálaj̥e' xrtizra Dios. <sup>15</sup>Bal-la b̥enneache zaj naque' ca b̥innedu ca' xejlechaze na dxu'a neza. Dxelenne' xrtizra Dios, na' ca dxedé na', dxezrín Satanás, na' dxucuasa na dizra' nigá da zua na xichaj lárzdau benne' ca'. <sup>16</sup>Benne' xula ca' zaj naque' ca b̥innedu ca' xejlechaze na lu xiaj. Ca dxelenne' xrtizra Dios, na' dxelébél̥e'ene' dxelezi'e na. <sup>17</sup>Tu chí'idauze dxelune' caní. Gate dxeledé'e' xel-la zi', ne zua da dxedábaga l̥e' ne chee xrtizra Dios, na' dxelexecuase' lawe' da quebe guxaze xrtizra Dios lú'ulete' xichaj lárzdawe' ca guca chee b̥innedu ca' quebe belún lue na lu xu situj. <sup>18</sup>Benne' xula ca' zaj naque' ca b̥innedu ca' xejlechaze na ládujla xixre' xeché' ca'. Dxelenne' xrtizra Dios. <sup>19</sup>Lawe' da dxelēbe'dxe' gunne xue da naca chee xezr la xu nigá dxezí x̥e' xel-la gunnía' l̥e', na' dxelézá lazre' da zante da dxelélé'ene'. Xúgute' da caní dxelú'u na xichaj lárzdau benne' caní, na' xuluxunite na dizra' da guxú'u xichaj lárzdawe', na' quebe gaca gun na ca da dxal-la' gun dizra' nigá. <sup>20</sup>Zaj zra' benne' dxelenne' xrtizra Dios, ne dxelézí' lu ne'e na. Bal-le' zaj naque' ca b̥innedu ca' gulebía na chí dxua tu tu na. Benne' xula zaj naque' ca b̥innedu ca' gulebía na ga xun tu tu na. Benne' xula zaj naque' ca b̥innedu ca' gulebía na tu gaxúa tu tu na.

### Xúgute' da nagache gulé'e lawe na

(Lc. 8.16-18)

<sup>21</sup>Cá'anqueze gunná Jesús, dxé'e benne' ca':

—¿Gúadxu xi', ne guzúadxu na zran xi'ina u che zran ga dxásedxu? Quebe gundxu ca', san guzúadxu na sibe chee gusení na. <sup>22</sup>Xúgute' da nagache gulé'e lawe na, na' xúgute' da xu'u xichaj lárzdaudxu wénqueze na. <sup>23</sup>Che nu benne' zua nague', dxal-la' xenne' da nigá.

<sup>24</sup>Cá'anqueze gunná Jesús:

—¡Le xene xanne' ca da dxénele! Ca da dxudxíxrele, nen l̥e' na' gudxíxrequeze Dios chee, na' gúnnadx̥e' le'e

dxénele. <sup>25</sup>Caní gaca na, benne' nape' da naca chee xrtizre'e, gunézrujdxé' chee', na' benne' quebe bi nape', ca da dauze da nape' xecá'ate' na.

### Da dxulé'e na ca naca chee binne da dxegula na

<sup>26</sup>Na' gunnáqueze Jesús:

—Da dxenná bea Dios naca na ca da dxaca gate tu benne' dxaze' binnedu ca' lu xu. <sup>27</sup>Dxásie' chizrela, dxase' te zra, na' binnedu caní dxelezzría na, ne dxelegula na, ne quegá nézene' ájala. <sup>28</sup>Dxaca na caní lawe' da nácaqueze ca da dxun xezr la xu. Nedxu dxebía na xrlegue na, nadxa za dau, na' bzébeté dxebía na binnedu ca' lu dau. <sup>29</sup>Gate ba gulegula xíxredu caní, na' dxechugue' na lawe' da ba bzrin zra xequé'e na.

### Da dxulé'e na ca naca chee binne mostaza

(Mt. 13.31-32; Lc. 13.18-19)

<sup>30</sup>Cá'anqueze gunná Jesús:

—¿Ájala gutil-la lébedxu da dxenná bea Dios, u che bila dizra' da dxulé'e na cá'adxu da gutil-la lébedxu le na? <sup>31</sup>Naca na ca tu binne mostaza da dxázadxu lu xu. Binnedu nigá nácadxa cuide' ca da zaj nnita lu xezr la xu. <sup>32</sup>Gate ba gúzadxu na dxegula na, na' dxaca na da zrendxa ca xixre' ca' da zaj naca na ba dagu, na' dxebía zruze na zren, na' dxácaté dxelebía bxinnedu ca' zran zrula chee na.

### Ca bgune Jesús da dxulé'e na caní

(Mt. 13.34-35)

<sup>33</sup>Caní bsede Jesús benne' ca' xrtizra Dios, na' bchálaje' zánete da dxululé'e na caní, cadite guléajni'ine'. <sup>34</sup>Quebe bchálaje' da xula. Tuze dizra' da dxulé'e na bchálajlene' benne' ca'. Bzájla'adxé' ca naca na benne' ca' dxusédené'.

### Jesús dxebeche zrié' be' bdonu'

(Mt. 8.23-27; Lc. 8.22-25)

<sup>35</sup>Lu zra ná'queze, ca gul-la chizrela, na' gunná Jesús, dxé'e benne' ca' dxusédené':

—Chéajdxu xecha la'a nísadau'.

<sup>36</sup>Besá'aque' naga zaj zra' benne' zan ca', na' guleché'e Jesús lu da dxedá lawe' nísadau' naga ba dxé'queze', na' gulennita xezícadxa da ca' dxeledá lawe' nísadau' ca' naga

zaj zra' benne', na' xjácalene' Le'. <sup>37</sup>Nadxa guzú lau dxaca tu be' bduunu' lu nísadau' na', na' dxu'ute nisa lu da dxedá lawe' nísadau'. Caní guca guzú lau dxezrá nisa lu da dxedá lawe' nísadau'. <sup>38</sup>Jesús de' dxasiē' lu xcúgüē' naga nácadxa sibe lu da dxedá lawe' nísadau'. Na' bulusebane' Jesús, dxelē'e Le':

—Benne' wesēde, ¿quebe dxe'u gunne xue wátedxu nate ca na'a?

<sup>39</sup>Nadxa guxasa Jesús, na' bchálajlene' be' bduunu', ne nísadau'. Dxenné':

—¡Gudxé zri'! ¡Zrize guzúa!

Gudxé zri' be' bduunu', na' nísadau' guzúa zri na. <sup>40</sup>Nadxa gunná Jesús, dxe'e benne' ca' dxusédene':

—¿Bizr chee na' dxezrébele'e le'e? ¿Quebe dxeajlí lázrele Dios?

<sup>41</sup>Belezrébele'edxe', ne dxelē' ljwezre':

—¿Núzraqueze benne' nigá? Dxuluzúa dizra' be' bduunu', ne nísadau' chee'.

### Tu benne' xezre Gadara, benne' xu'e be' xriwe'

(Mt. 8.28-34; Lc. 8.26-39)

**5** <sup>1</sup>Bezrín Jesús, tu zren nen benne' ca' dxusédene' xecha la'a nísadau' lu xezr la xu chee benne' Gadara ca'. <sup>2</sup>Ca bedxúaj Jesús lu da dxedá lawe' nísadau', na' bzrin tu benne' xu'e be' xriwe' naga zua Jesús. Bedxúaje' lu bluaj naga zaj nagache benne' gate ca'. <sup>3</sup>Benne' biu nigá zúaqueze' lu bluaj na'. Quebe nu dxezúe guchéaj lebe' chalásaze, lácala nu guchéaj lebe' nen du xia. <sup>4</sup>Zane' lasa buluchéaje' lebe' nen du xia na'abe', ne ní'abe'. Bzúzrujbe' du xia ca', na' quegá nu guzeque nna bé'ene' lebe'. <sup>5</sup>Dxedáquezebe' te zra chizrela lu xi'a ca', ne lu bluaj ca' naga zaj nagache benne' gate. Dxebezre xa'abe', ne dxeajcházebe' lu xiaj ca', dxun we' cuínabe'. <sup>6</sup>Gate ble'ebe' zítu'la ba za Jesús, na' guzá chégube', xeajzú zríbebe' lau Le'. <sup>7</sup>Gunné zizraj be' xriwe' xu'ube', dxē na Jesús:

—¿Bizra dxaca chiu' nen neda', Jesús, Zri'ine Dios szrente? Lu La Xránadxu Dios, dxata' xueda' Lue', quebe gudéu' neda' xel-la zi'.

<sup>8</sup>Caní gunná na lawe' da gunná Jesús, dxe'e na:

—Lue', da xriwe', bedxúaj lu bel-la' dxen chee benne' nigá.

<sup>9</sup>Nadxa gunaba Jesús, dxe'e na:

—¿Bi leu'?

Na' bechebe na:

—Da Zan lea', lawe' da naxantu'.

<sup>10</sup>Guta' xue na Jesús chee quebe xesel-le' na, ne quebe gucuase' na zitu' lu xezr la xu na'. <sup>11</sup>Zaj zra' gagu lu xi'a na' tu cue' cuche zaj zra'ba' dxeláguba'. <sup>12</sup>Gulata' xue be' xriwe' ca' Jesús, gulenná na:

—Besel-la netu' lu cuche ca'. Benna lataj ch́'untu' leba'.

<sup>13</sup>Nadxa Jesús be'e na lataj. Na' be' xriwe' ca' beledx́'aj na lu b́ennea', na' gulú'u na cuche ca'. Zaj nácaba' ca galaj gaxúa cuche ca', na' buludxixre cuínaba' tu chejéa. Xeajlechásteba' lu nísadau', ne guláteteba' lu nisa na'.

<sup>14</sup>Benne' ca' dxuluxúe' cuche ca' buluxuzŕ'nnuje', na' xeajlezenne' benne' zaj zre'e lu xezre, ne benne' zaj zre'e le'e xixre'. Na' belezŕn benne' ca' naga zua Jesús, benne' ca' belenne' ca da ba guca. <sup>15</sup>Gate belezŕn benne' ca' naga zua Jesús, na' belelé'ene' b́ennea' guxú'ube' be' xriwe' ca', dxe'ebe' ga zua Jesús, nácube' tu ladze', ne ba bezúa xrlátaje lu xichaj lázrdaube', na' gulezrebe'. <sup>16</sup>Benne' ca' belelé'e ca naca da guca chee benne' guxú'ube' be' xriwe' ca', ne ca guca chee cuche ca' buluchálaje' chee da ba guca. <sup>17</sup>Nadxa benne' xezre ca' gulata' xuene' Jesús xedx́'ajé' lu xezr la xu chee'.

<sup>18</sup>Ca bexú'u Jesús lu da dxedá lawe' nísadau', na' b́ennea' guxú'ube' be' xriwe' ca' guta' xuebe' Jesús gu'e lataj chéajlebe' Le'. <sup>19</sup>Quebe be' Jesús lebe' lataj, san dxe'e lebe', gunné':

—Bexiaj lizru', ne xeajchálajle xrtiu' ca' ca naca da zren ca' da ben Xranu' nen lue', ne ca bexache lazre' lue'.

<sup>20</sup>Nadxa bezá'abe' zexíajbe', ne guzú laube' dxuchálajbe' lu xezre ca' zaj nababa Decápolis ca naca da zren da ben Jesús nen lebe'. Belexebánele'e xúgute benne' zaj zre'e xezre ca'.

**Bi nu'ula chee Jairo, ne nu'ula na' xeajté' zra lana Jesús**

(Mt. 9.18-26; Lc. 8.40-56)

<sup>21</sup>Begüén Jesús lu da dxedá lawe' nísadau', na' bezrine' xecha la'a nísadau'. Belezŕn benne' zan naga ze', na' Le' begá'ane' dxu'a nísadau'. <sup>22</sup>Ca'an guca bzrin tu benne' xíchaje chee xu'u naga dxelúe lá'ana judío ca' Dios, benne' le' Jairo. Gate blé'ene' Jesús, na' bzu zribe' zran ni'e. <sup>23</sup>Guta' xuene' Jesús, dxe'e Le':

—¡Bi nu'ula chia' ba dxátebe!! ¡Gudá, bze na'u lebe' chee xexácabe', ne xaca banbe!!

<sup>24</sup>Nadxa guxíajle Jesús bēneā, na' bēneache zan xjácāleñe' Le', ne dxuluchítee' Le'. <sup>25</sup>Ládujla bēneache ca' za tu nu'ula quebe chawe' zue', ba zeaj chazrinu iza nape' we' dxen. <sup>26</sup>Da zren da bulusaca benne' dxelexún bēneache ca' nu'ula nigá, na' bache ben dítajē' xúgute da nape'. Quegá bi gúcale na le', san bzáladxa we' chee'. <sup>27</sup>Gate ben nú'ula' dxuluchalaj bēneache ca naca chee Jesús, na' bzrine' cúzrula Jesús ládujla bēneache, na' xeajté' zra lana Jesús. <sup>28</sup>Caní bene' lawe' da gunné' lu xichaj lázrdawe': Cun cheajtaza' zra lana Jesús, na' xexácatea'. <sup>29</sup>La gulézate xel-la we' chie', ne la guque b'éteñe' ba bexaca bel-la' dxen chee' chee xízrawe' na'. <sup>30</sup>Gúquebe'e Jesús ben zrin xel-la waca chee'. Chee le na' bexéchajē', dxenné'e bēneache ca', na' gunábene' le':

—¿Nuzra bedajtá zra lana'?

<sup>31</sup>Nadxa benne' ca' dxusede Jesús gulé'e Le':

—Dxel'équeznu' bēneache zan dxuluchíe' Lue'. ¿Bizr chee na' dxenabu': “Nuzra bedajtá neda'?”

<sup>32</sup>Jesús guzúe' dxenné'e cuitē' chee lé'ene' nua' bedajtá Le'.

<sup>33</sup>Nadxa guxíaj nu'ula nigá, dxezrízie' dxezrebe' lawe' da nézene' ca da ba guca chee', na' bzu zribe' lau Jesús, na' gunné' ca naca da li. <sup>34</sup>Nadxa gunná Jesús, dxē'e nu'ula':

—Bi nú'uladau', ba bexacu' lawe' da guxeajlí lazru' neda'. Bexíaj, cútudxa zrebu'. Ba bexácatequezu' chee xízrawe' da guzxacu'.

<sup>35</sup>Ne dxuchálajte Jesús gate belezrín benne' gusá'aca lizre benne' xíchajē chee xu'u naga dxelúe lánana judío ca' Dios, na' gulé'e xra nú'uladau' na':

—Bi nú'uladau' chiu' ba gútebe'. ¿Bizr chee na' dxunu' zédedxa benne' dxusede nigá?

<sup>36</sup>Gate Jesús benne' ca da gulenná benne' caní, dxē'e benne' xíchajē chee xu'u na', gunné':

—Quebe zrebu'. Guxeajlí lazre' neda'.

<sup>37</sup>Quebe be'e lataj chjácāle bēneache zan ca' Le'. Tuze be'e lataj gusá'acale Pedro, ne Jacobo, ne Juan, biche Jacobo nigá, nen Le'. <sup>38</sup>Ca belezrine' lizre benne' xíchajē na', na' ble'e Jesús bēneache dxelún schaga. Dxelebezre benne', ne dxelebezre xa'ate'. <sup>39</sup>Nadxa guxú'u Jesús lu xu'u, na' dxē'e benne' ca', gunné':

—¿Bizr chee na' dxunle schaga? ¿Bizr chee na' dxebézrele? Quegá nate bidau' nu'ula. Dxásezebe'.

<sup>40</sup>Belún lala benne' ca' chee'. Nadxa Jesús bebéaje' xúgute benne' ca', na' guché'e xrabe', ne xrna bidau' nigá, ne benne' ca' zjácalene' Le', na' guxú'e naga de nú'uladu na'. <sup>41</sup>Béxrue' na'be', ne guzre' lebe':

—Bi nú'uladau', lue' dxapa': ¡Guxasa!

<sup>42</sup>La bexásate nú'uladu na', na' guzátebe' lawe' da ba zéajbe' chazrinnu iza. Na' benne' ca' zaj zre'e lu xu'u na' belezrébele'e. <sup>43</sup>Jesús gunná bé'ene' benne' ca' chee quebe nu xelé'e ca da bene'. Nadxa guzré' benne' ca' xulugawe' nú'uladu na'.

### Dxezrín Jesús lazrie' da nacan xezre Nazaret

(Mt. 13.53-58; Lc. 4.16-30)

**6** <sup>1</sup>Jesús bezé'e naga zue', ne bezrine' lazrie', na' benne' ca' dxusédene' xjácalene' Le'. <sup>2</sup>Ca gula zra dxulupá'ana judío ca', na' bezú lau Jesús dxusédene' benne' ca' zaj zre'e lu xu'u naga dxelúe lá'ana judío ca' Dios. Bénneache zan belenne' chee', ne belexebánene', dxelenné':

—¿Gazra bsede benne' nigá ca nácate? ¿Bizra xel-la sina da nunezruj Le', ne xel-la waca zren caní da dxune'? <sup>3</sup>¿Quegá benne' nigá gubizre xaga, zri'ine María, na' benne' biche' ca' zaj naque' Jacobo, ne José, ne Judas, ne Simón, na' nu'ula zane' ca' cá'aqueze zaj zralene' dxi'u?

Chee le na' quebe guléajle'e chee Jesús. <sup>4</sup>Na' gunná Jesús, dxee' benne' ca':

—Xúgute benne' dxelape' ba lá'ana tu benne' dxuchálaje' waláz chee Dios, san benne' waláxr chee' ca', ne benne' xrtie' ca', ne benne' zaj zre'e xu'u lizre' quebe dxelape' le' ba lá'ana.

<sup>5</sup>Chee le na' quebe ben Jesús lazrie' na' netú xel-la waca zren. Tuze bexune' bál-laze benne' we' gate na' guxrúa ne'e xichaj benne' ca'. <sup>6</sup>Bebane Jesús lawe' da quebe guléajle'e chee'.

**Jesús dxusel-le' benne' ca' dxusédene' cheajlechálaje' xrtizra**

### Dios

(Mt. 10.5-15; Lc. 9.1-6)

Ca gudé na' bedé Jesús xecha lasa xézredu ca' zaj nnita gáguze, na' bsédene' benne' zaj zre'e ga na'. <sup>7</sup>Gunné' benne' chazrinnu dxusédene', ne guzú lawe' dxesel-le' le' chupa weaje', ne bnézruje' le' xel-la waca xulucuse' be' xriwe' ca' lu bel-la' dxen chee bénneache ca'. <sup>8</sup>Gunná bé'ene' le' quebe



bi xelu'e chee la neza, con tuze xaga da xuluchiche'. Quebe xelu'e xixruj xeta, ne xeta, ne dumí. <sup>9</sup>Waca xululéaje' zrele', ne xelácu'e tu cueze zra lane'. <sup>10</sup>Gunnadxa Jesús, dx'e'e benne' ca':

—Gate na' chu'ule le'e tu lu xu'u chee benne', waca xegá'anatele lizre bēnea' ca zrindxa zra xezá'ale lu xezre na'. <sup>11</sup>Che zrinle tu lu xezre naga quebe xuluxé lawe' le'e, ne quebe xelēnē' chee, waca xezá'ale, na' cuíbetele bxrte xu da dxedá' ní'ale. Da nigá gaca na tu da dxul'éle na zaj nabaga benne' xezre na' zria, benne' dxeledábaga' le'e. Da li dxennéa', lu zra guchi'a Dios chee bēneache, waxache' gácadxa da ba xa' da xeledé benne' xezre Sodoma, ne benne' xezre Gomorra quézcala da xeledé benne' xezre ca' naga quebe buluzé nague' chee.

<sup>12</sup>Nadxa gusá'aca benne' ca' dxusede Jesús, na' buluchálajle' bēneache chee xelexebí'i lazre'. <sup>13</sup>Cá'anqueze belexebáje' zánete be' xriwe' ca' lu bel-la' dxen chee bēneache ca', na' gulegüe'e da za zane' benne' we', na' belexexaque'.

### Ca gute Juan, benne' bchue' bēneache nisa

(Mt. 14.1-12; Lc. 9.7-9)

<sup>14</sup>Na' ben wenná bea Herodes ca naca da zren ca' da dxun Jesús lawe' da guzé dizra' chee'. Bal-la benne' dxelenné':

—Juan, benne' bchue' bēneache nisa, bache bebane' ládujla benne' gate, na' chee le na' nape' xel-la waca zren nigá.

<sup>15</sup>Benne' xula dxelenné':

—Elías, bēnea' bchálaje' waláz chee Dios benne' nigá.

Benne' xula dxelenné':

—Nácalje' bēnea' dxal-la' xelá' guchálaje' waláz chee Dios, che nácalje' benne' gulasa, benne' bchálaje' waláz chee Dios.

<sup>16</sup>Ca ben Herodes da caní, na' gunné':

—Benne' nigá naque' Juan, bēnea' gunná be'eda' neda' gulechugue' xíchaje'. Benne' nigá ba bebane' ládujla benne' gate.

<sup>17</sup>Caní gunná Herodes lawe' da gunná be'e le' buluzúe' Juan na' lizre xia, ne buluchéaje' le' du xia, da na' bene' lawe' da dxezrá'a Herodías le'. Herodías nigá guque' zru'ula Felipe, benne' biche Herodes. Herodes nigá bequ'éle nu'ula' chee guque' zru'ule'. <sup>18</sup>Gunná Juan, dx'e'e Herodes:

—Quebe dxal-la' súałenu' zru'ula bi bichu'.

<sup>19</sup>Chee le na' Herodías guzré'e Juan, ne guca lazre' gútete' le'. Quebe guca chee' <sup>20</sup>lawe' da neze Herodes naca Juan nigá tu benne' xrlátaje, ne benne' naque' tuze nen Dios, na' bezrebe' le'. Chee le na' quebe be'e lataj Herodías na' gútete' Juan nigá, na' lácala quebe guxéajni'ine' ca naca xúgute da bchalaj Juan, Herodes nigá bze nague' chee' du lazre'. <sup>21</sup>Herodías na' bzrélene' ájala gune' ca da dxaca lazre' gate na' guxú'u laní ca gula la Herodes. Gulé'aj gulagu benne' xíchaje ca', ne benne' dxelenná be'e lu wedil-la, ne benne' zaj naque' blau lu xezre ca' zaj nababa Galilea. <sup>22</sup>Nadxa guxú'u bi nu'ula chee Herodías na' lu xu'u naga dxelé'aj dxelawe', ne bxá'abe' lau benne' ca'. Bezaca ba lazre' Herodes ca bxá'abe', ne tuze ca belún benne' ca' zaj zra' dxelawe' tu zren nen le'. Gunná wenná bea Herodes, dxe'e nu'ula cuide' nigá:

—Gunaba neda' ca da dxedánuenu', na' gunna' na chiu'.

<sup>23</sup>Guchebe lazre' Herodes, ne bzétaje' Dios gunéruje' bíteteze da nábabe', lácala nábabe' gáchajte naga dxenná be'e le'.

<sup>24</sup>Nadxa nu'ula cuide' nigá bdxúajbe', xejcháajlebe' xrnabe', gunabe':

—¿Bizra naba'?

Gunná xrnabe':

—Gunaba xichaj Juan, bénnea' bchue' bénneache nisa.

<sup>25</sup>La guxu'ute nu'ula cuide' nigá naga zua wenná bea, na' gunabe', dxe'ebe' le':

—Dxaca lazra' gunnu' neda' na'a tu lu xé'ena xichaj Juan, bénnea' bchue' bénneache nisa.

<sup>26</sup>Nadxa wenná bea nigá bewí'inele'e, ne lawe' da ba bzétaje' Dios, na' belénete benne' ca' da gunné', quebe guca lazre' guzruné' ca da gunaba bi nu'ula nigá. <sup>27</sup>Chee le na' gusel-la wenná bea tu benne' dxeje' wedil-la, ne gunná bé'ene' le' cheajxrí'e xichaj Juan na'. <sup>28</sup>Guxíaj benne' nigá lu xu'u lizre xia, na' bdxixre' xichaj Juan na', ne bexu'e na tu lu xé'ena. Bnézrujte' na bi nu'ula na', na' lebe' bnézrujbe' na xrnabe'.

<sup>29</sup>Gate gulénneze benne' ca' da nigá, benne' ca' bsede Juan, na' xejlexexrí'e bel-la' dxen chee', na' xejlecáchete' na.

**Jesús dxugawe' chi xun gaxúa benne' biu**

(Mt. 14.13-21; Lc. 9.10-17; Jn. 6.1-14)

<sup>30</sup>Ca gudé na' belexezrín benne' gubáz ca' chee Jesús naga zua Le', ne buluzenne' Le' xúgute ca da belune', ne ca

da bulusédene' benne' ca' naga xjaque'. <sup>31</sup>Nadxa gunná Jesús, dxe'e benne' ca':

—Le chu'u. Chéajdxu xezí' lázredxu chadite' naga xu'u lataj.

Gunné' caní lawe' da dxesá'aca benne' dxesá'aca, ne dxelexezrín benne' dxelexezrín, na' quebe dxelu'e lataj xelawe'. <sup>32</sup>Nadxa Jesús ne benne' gubáz chee' ca' belexexú'e leze' tu lu da dxedá lawe' nísadau', na' belezrine' tu lataj naga quebe nu chilá' benne'. <sup>33</sup>Benne' zan ca' belelé'ene' ca' zjaque', ne belexexúnbe'e Jesús, na' gusá'aca chégüe' xjá'aque' na'. Benne' xúgute xezre ca' belezrine' lataj na' nédxudxa ca Jesús. <sup>34</sup>Gate bedxúaj Jesús lu da dxedá lawe' nísadau', na' blé'ene' benne' zante, ne bexache lazre' le' lawe' da zaj zre'e ca zrila' ca' quebe zua benne' dxuxúe' leba'. Na' guzú lawe' dxusédene' benne' ca' da zante. <sup>35</sup>Ca gula guzré', belezrín benne' ca' dxusede Jesús lau le', na' gulé'e le':

—Ba dxaca waxrinne, na' quegá nu lizre benne' zua lataj nigá. <sup>36</sup>Besel-la benne' caní chee cheajxaque' xezre ca' zaj nnita gálaze chee xelezí'e xeta xelawe' lawe' da quebe bi de nigá da xelawe'.

<sup>37</sup>Na' gunná Jesús, dxe'e le':

—Le gunezruj le'e da xelawe'.

Na' gulenné', dxelé'e Jesús:

—¿Waca chéajntu' cheajgá'untu' xeta xtila, quízrujntu' lazruj chee chupa gaxúa zra chee gugágudxu benne' zan caní?

<sup>38</sup>Na' gunná Jesús, dxe'e le':

—¿Bal-la xeta xtila ná'pale? Le cheajnná'.

Ca gulénézene', na' gulenné', dxelé'e Jesús:

—Gaxxu' xeta xtila, ne chupa béladau'.

<sup>39</sup>Nadxa gunná be'e Jesús gulebé'e xúgute bénneache ca' tu cue' weaj lu xrguie xa'a. <sup>40</sup>Na' gulebé'e tu cue' weaj, du tu gaxúe', du chi xune'. <sup>41</sup>Nadxa Jesús b'éxrue' gazxu' xeta xtila ca', ne da chupa béladau'. Na' guchisa lawe' xabaala, gunabe' lau Dios gun la'azxe' na, na' bzúzruje' xeta xtila ca', ne bnézruje' na benne' ca' dxusédene' chee gulísie' na chee benne' ca'. Cá'anqueze gudísie' da chupa béladau' chee xúgute benne' ca'. <sup>42</sup>Na' gulagu xúgute' ne gulélajte'. <sup>43</sup>Nadxa buluxutube' ca da begá'ana chee xeta xtila, ne chee béladu ca', na' guca chazrinnu xcuite xca'a. <sup>44</sup>Benne' ca' gulawe' xeta xtila ca' zaj naque' chi xun gaxúa benne' biu.

**Dxezá Jesús lawe' nísadau'**  
(Mt. 14.22-27; Jn. 6.16-21)

<sup>45</sup>La gunná bé'etē Jesús benne' ca' dxusédene' gulu'e lu da dxdadá lawe' nísadau' chee gulelague' nísadau' na' nédxudxa ca Le', chee xelexezrine' lu xezre Betsaida dxácatē Le' dxuzé' dizra' bēne' ca'. <sup>46</sup>Ca gudé bze' dizra' benne' ca', na' guzé'e zéaje' lu xi'a zeajchálajlene' Dios. <sup>47</sup>Gate gula guxrínnequeze, ba zeaj da dxdadá lawe' nísadau' na' gachaj lawe' nísadau', na' begá'ana Jesús tuze' lu xu dxu'a nísadau'. <sup>48</sup>Gate blé'ene' ca dxelezraga lawe' dxulusé'e da dxdadá lawe' nísadau' lawe' da za be' na', dxuzrí'i na da dxdadá lawe' nísadau' na', na' gula balá' gubiga Jesús naga zaj zre'e, dxezé'e lawe' nísadau' na', ne guca lazre' téé' lau da dxdadá lawe' nísadau' na'. <sup>49</sup>Gate belelé'ene' Le' ze'e lawe' nísadau' na', guléquene' da dxdadá dxēla, na' gulebezre xē'e. <sup>50</sup>Belelé'e xúgute' ca dxezé'e lawe' nísadau', na' belezrébele'e. Na' gunná Jesús, dxē'e benne' ca' dxusédene':

—Ga zrébele. Neda' nigá. Le gun chuchu lázrele.

<sup>51</sup>Nadxa guluén Jesús lu da dxdadá lawe' nísadau' naga zaj zre'e, na' guleza be' na'. Na' guleque zréajene', ne belexebánele'ene', <sup>52</sup>lawe' da quebe ne xelájni'ine' ca naca xel-la waca zren da bene' chee xeta xtila ca', lawe' da ne dxun zide' xichaj lázrdawe'.

**Dxexún Jesús benne' wē' ca' lu xezre Genesaret**  
(Mt. 14.34-36)

<sup>53</sup>Gate na' gulelague' nísadau', belezrine' lu xezr la xu chee benne' xezre Genesaret, na' buluchéaje' xaga da dxdadá lawe' nísadau' dxu'a nísadau' na'. <sup>54</sup>Ca beledxúaje' lu da dxdadá lawe' nísadau', la belexexúnbeate bēneache ca' Jesús. <sup>55</sup>La gusá'aca chégute' zjaque' lu xezre ca' xejlexrí'e benne' wē' ca' tu tu lu ta'a, na' zeajlegüé'e le' naga zaj nézene' xedé Jesús. <sup>56</sup>Gáteteze xézredu ca', ne xezre ca', ne le'e xixre' naga dxdedé Jesús, na' buluzúe' benne' wē' ca' du la neza, ne gulata' xuene' Jesús gunézruje' lataj cheajletaze' zra lane', na' xúgute' benne' ca' xejleté' zra lane' belexexácatē'.

**Da dxucá'ana sban bēneache**  
(Mt. 15.1-20)

**7** <sup>1</sup>Benne' fariseo ca' nen bal-la benne' dxuluxuzájle'e da bdxixruj be'e Moisés, benne' gusá'aque' Jerusalén,

belezríne' lau Jesús. <sup>2</sup>Benne' caní belelé'ene' ca dxelún bal-la benne' dxusede Jesús, dxelawe' xeta ne quebe zaj naxibe ne'e ca dxelenná bea benne' xudau' ca'. Chee le na' gulenná benne' Jerusalén ca':

—Zaj naca sban na' benne' ca' dxusede Jesús.

Nadxa gulezί tizre' le'.

<sup>3</sup>Caní gulenná benne' ca' lawe' da zjácale benne' xudau' fariseo ca', ne xúgute benne' judío ca' ca naca da belún xra xtau benne' ca', quebe dxelawe' xeta che quebe zaj naxibe ne'e zane' lasa. <sup>4</sup>Gate zjaque' lawe' xi'a wa'u, ca dxelexezrine' quebe dxelawe' xeta che quebe xelibe ne'e ca zaj nadxixruj bea benne' xudau' ca'. Cá'anqueze dedxa da zante da zjácale, ca xexadxé zriga' da dxelé'aje', ne zruaga, ne zriga xé'ena, ne da naga dxelásie'. <sup>5</sup>Nadxa benne' fariseo ca', ne benne' ca' dxuluxúzajle'e da bdxixruj be'e Moisés gulenábene' Jesús:

—¿Bizr chee na' quebe zjácale benne' ca' dxusédenu' ca naca da gulún benne' gula? Dxelawe' xeta, zaj naca sban ne'e.

<sup>6</sup>Na' bechebe Jesús:

—Láweze dxunle da xrlátaje. Lu lázrdaule xu'ule da calela.

Cháwedau' bchálajqueze Isaías ca nácale le'e gate na' bzuaje' caní: Bénneache caní dxelúe lá'ane' neda' nen dxú'aze'.

Xichaj lázrdawe' ca' zaj nacuasa na neda'.

<sup>7</sup>Níteze naca xel-la ba lá'ana da dxelu'e neda',

lawe' da dxulusédene' da zaj nadxixruj bea bénneacheze.

<sup>8</sup>Caní naca xca', le'e dxuzúale chalá'ala ca da nadxixruj bea Dios, na' zéajlele ca naca da gulún bénneache ca dxíbele zruaga, ne zriga' cheele, ne zánete da caní da dxunle.

<sup>9</sup>Na' gunnadxe', dxé'e benne' ca':

—Chala'ala dxuzúale ca da nadxixruj bea Dios chee zéajlele ca naca da tu dxúnzquezle. <sup>10</sup>Caní gunná Moisés na': "Gudapa ba lá'ana xra xrna'u." Cá'anqueze gunné': "Che tu benne' nne' schanni' chee xre', che xrne'e, con gátequeze bénnea'." <sup>11</sup>Le'e dxennale, "Che tu benne' xe'e xra xrne'e: Corbán," da zéaje na, quebe gaca gácalena' le'e lawe' da bache bnézruja' chee Dios ca naca da de chia'. <sup>12</sup>Che ca'an dxenné', nadxa le'e québedxa dxu'ule le' lataj gácalene' xra xrne'e. <sup>13</sup>Gate dxunle caní dxuzúale chalá'ala xrtizra Dios, chee gunle ca da zéajlele. Na' zéajquezle dxunle zánete da zaj naca na caní.

<sup>14</sup>Xecha lasa gunné' Jesús bénneache ca', na' gunné', dxé'e le':

—Le guzé nágale xúgutele, ne le chéajni'i. <sup>15</sup>Netú da dxe'aj dxagu benne' quebe seque gucá'ana na le' sban. Da dxedxuaj na lu xichaj lázrdau bénneache, le na' dxucá'ana na le' sban. <sup>16</sup>Le'e zua nágale, le xene.

<sup>17</sup>Gate gucuasa Jesús naga zaj zra' benne' ca', na' guxú'e lu xu'u. Nadxa benne' ca' dxusédene' gulenábene' Le' ca naca chee da dxulé'e nigá. <sup>18</sup>Nadxa gunná Jesús, dxe'e le':

—¿Cá'anqueze le'e quebe dxéajni'ile? ¿Quebe dxéajni'ile xúgute da dxe'aj dxagu bénneache quebe seque gucá'ana na le' sban <sup>19</sup>lawe' da quebe dxu'u na lu xichaj lázrdawe'. Dxu'u na lu le'e, na' dxedxuaj na?

Cate' gunná Jesús caní blé'ene' zaj naca chawe' xúgute da dxe'aj dxágudxu. <sup>20</sup>Na' gunnadxe':

—Ca naca da dxedxuaj na lu xichaj lázrdau bénneache, le na' dxucá'ana na le' sban <sup>21</sup>lawe' da lu xichaj lázrdau bénnea' dxeledxúaj ca da calela da dxuwía lazre', ne dul-la da dxucá'ana ditaj xel-la wechaga na', ne dul-la chee da sban, ne wete benne', <sup>22</sup>ne xel-la gubán, ne da dxezá lazre' gapa da naca chee benne' xula, ne da calela ca', ne xel-la wezrí xe', ne da dxezá lazre' da sban, ne xel-la zre'e lazre', ne xel-la wechalaj dizra' bizruj, ne xel-la dxun szren cuina, ne xel-la dxuchalaj bigaze. <sup>23</sup>Xúgute da calela caní dxeledxúaj na lu xichaj lázrdau bénneache, ne dxuluxrinnaj na le'.

### **Tu nu'ula quebe naca judío dxeajlí lazre' Jesús**

(Mt. 15.21-28)

<sup>24</sup>Na' bezá'a Jesús naga zue', guxíaje' lu xezre ca' zaj nababa xezre Tiro, ne xezre Sidón. Guxú'u Jesús tu lu xu'u, ne quegá guca lazre' nu xene. Quebe guca gache'. <sup>25</sup>La gunézetē tu nu'ula zua Jesús na'. Nu'ula nigá zua tu zrí'ine' nu'ula, xu'ube' be' xriwe'. Bla' nu'ula' naga zua Jesús, ne bzu zribe' lawe'. <sup>26</sup>Nu'ula nigá quebe naque' nu'ula judío. Naque' nu'ula chee tu xezre nababa xezr la xu Sirofenicia. Bzrine' lau Jesús, na' gunabe' Le' xebéaje' be' xriwe' da xu'u zrí'ine' nu'ula. <sup>27</sup>Gunná Jesús, dxe'e nu'ula':

—Be' lataj xelagu nedxu zri'ine benne' lu xu'u, lawe' da quebe naca chawe' cúadxu xeta xtila chee bidu ca', ne gunézrujdxu na chee bécudu ca'.

<sup>28</sup>Na' gunná nu'ula':

—Awe', Xran, san bécudu ca' zaj zra' zran ga dxelágube' dxeláguquezba' xeta bizruj da dxuluzexruj bidu ca'.

<sup>29</sup>Nadxa gunná Jesús:

—Ne chee dizra' da ba gunnéu', bexíaj na'a. Bache bedxúaj be' xriwe' lu bel-la' dxen chee zri'inu' nu'ula.

<sup>30</sup>Gate bezrín nu'ula' lizre', na' blé'ene' zrí'ine' nu'ula debe' lu da naga dxásebe', na' be' xriwe' ba bedxúaj na lu bel-la' dxen cheebe'.

**Dxexún Jesús tu benne' nacuézrué', ne quebe dxaca nnie'**

<sup>31</sup>Nadxa bedxúaj Jesús, bezé'e naga nababa xezre Tiro, na' gudétie' naga nababa xezre Sidón, ne xezre ca' zaj nababa Decápolis, na' bezrine' dxu'a nísadau' chee xezr la xu Galilea.

<sup>32</sup>Nadxa bedajleguá' benne' ca' tu benne' nacuézrué', ne quebe dxaca nnie', na' gulenábe' Jesús xrua ne'e benne' nigá. <sup>33</sup>Guché Jesús benne' nigá chalá'ala naga zaj zra' benne' ca', na' bdie' zrube ne'e lu naga bénnea', na' bzre'e zrene', ne bte' lawe' luzre bénnea'. <sup>34</sup>Nadxa la gunná'te' xabáa, ne gucá'a lazre', gunné':

—Efata.

Dizxa' nigá zéaje na: Bxalaj.

<sup>35</sup>Ca gunné' caní, na' bxalaj naga benne' cuezru nigá, ne bexaca luzre'. Nadxa guca bchálaje'. <sup>36</sup>Na' gunná Jesús, dxé'e benne' ca' quebe nu xelé'e ca da bene'. Lácala gunná be'ene' le' caní, buluchílujdxé' dizra' ca da bene'. <sup>37</sup>Benne' ca' zaj zra' na' belexebánele'ene', dxelenné':

—Xúgute dxune' cháwedau'. Dxexune' benne' cuezru ca', na' dxeléntene', ne dxexune' benne' ca' quebe dxaca nnie', na' dxelenné'tie'.

**Dxugagu Jesús chua gaxúa benne' biu**

(Mt. 15.32-39)

**8** <sup>1</sup>Ca lu zra ca' zaj nazraga benne' zan, na' quebe bi de da xelawe'. Ca'an guca gunné Jesús benne' ca' dxusédené', na' guzre' le':

<sup>2</sup>—Neda' dxexache lazra' benne' caní lawe' da bache guca chunna zra zaj zre'e nigá nen neda', ne quebe bi de da xelawe'. <sup>3</sup>Che ca' xesel-la' le' lizre' quebe xelawe', na' xelate ni'a ne'e la neza lawe' da zá'aca bal-le' zitu'.

<sup>4</sup>Na' belexechebe benne' ca' dxuséde Jesús, dxelé'e Le':

—¿Ájazra gundxu gunézrujdxu da xelawe' nigá, ga quebe nu chilá' benne'?

<sup>5</sup>Jesús bchebe' le':

—¿Bal-la xeta xtila nápa le'e?

Benne' ca' gulenné':

—Gazre na.

<sup>6</sup>Nadxa gunná be'e Jesús xelebé' xúgute bēnneache ca' lu xu. Nadxa guqué'e xeta xtila, ne guzre' Dios:

—Xcalenu'.

Nadxa bzúzruje' na, ne bnézruje' na benne' ca' dxusédené', na' benne' caní gulísie' na lówela xúgute bēnneache ca'. <sup>7</sup>Zaj nápaqueze' tu chupa bēladau'. Na' Jesús gunabé' Dios guné' na chawe'. Nadxa gunná bé'ene' gulise benne' ca' le na. <sup>8</sup>Gulagu xúgute bēnneache ca', ne belezúale'e chawe'. Ca gudé na' bulusuzré'e gazre xcuite xca'a nen xeta bizruj da belegá'ana. <sup>9</sup>Benne' ca' gulawe' zaj naque' ca chua gaxúa benne' biu. Nadxa Jesús bze' benne' ca' dizra'. <sup>10</sup>Nadxa guxú'e lu da dxedá lawe' nísadau' nen benne' ca' dxusédené'. Xjaque' lu xezr la xu chee benne' xezre Dalmanuta.

### **Dxelenabé' Jesús guné' tu xel-la waca**

(Mt. 16.1-4; Lc. 12.54-56)

<sup>11</sup>Nadxa belezrín benne' xudau' fariseo ca' ga na', ne gulezú lawé' dxulutil-le' dizra' nen Jesús. Gulenabé' Jesús guné' tu xel-la waca da za xabáa, chee xelenézené' bi xel-la waca nape'.

<sup>12</sup>Nadxa Jesús gucá'a dxgua lazre', gunné':

—¿Bizr chee na' dxelenaba benne' caní guna' tu xel-la' waca da za xabáa? Da li dxapa' le'e, québequeze bi xel-la waca guna' lau le'e.

<sup>13</sup>Nadxa Jesús bca'ane' benne' ca', na' bexu'e lu da dxedá lawe' nísadau', dxexíaje' xechelá'a chee nísadau'.

### **Da naca ca cua zichaj chee xeta xtila**

(Mt. 16.5-12)

<sup>14</sup>Gulal-la lazre' benne' ca' dxusede Jesús xelu'e da xelawe', na' zaj nu'e tuze xeta xtila lu da dxedá lawe' nísadau'. <sup>15</sup>Nadxa Jesús gunná bé'ene', dxé'e benne' ca':

—¡Le nna'xque nigá! Le guxúe cuínale da naca cua zichaj chee xeta xtila chee benne' xudau' fariseo ca', ne ca naca cua zichaj chee xeta xtila chee Herodes.

<sup>16</sup>Nadxa benne' ca' dxusede Jesús gulé' ljwezre':

—Le' dxenné' caní lawe' da quebe de xeta xtila gágudxu.

<sup>17</sup>Dxeque be'e Jesús da dxelenné', na' guzre' le':



—¿Bizr chee na' dxennale quebe de xeta xtila gágudxu?  
¿Quebe ne chéajni'ile ne quebe dxeque be'ele? ¿Nácale'e zide'  
lázrdaule? <sup>18</sup>¿Quebe dxel'é'ele nen xiaj laule, ne quebe dxenle  
nen nágale? ¿Quebe dxeajsá lázrele? <sup>19</sup>Gate na' bgawa' chi xun  
gaxúa benne' biu nen gazxu' xeta xtila, ¿bal-la xcuite xca'a xeta  
bizruj da becá'ale?

Benne' ca' gulenné':

—Chazrinnu na.

<sup>20</sup>Na' gunná Jesús:

—Na' gate na' bgawa' chua gaxúa benne' biu nen gazre xeta  
xtila, ¿bal-la xcuite xca'a da zaj zrate becá'ale?

Le' gulenné':

—Gazre na.

<sup>21</sup>Nadxa Jesús guzre' benne' ca':

—¿Ne la gázqueze quebe dxéajni'ile?

### Jesús dxexuné' tu benne' la chul-la

<sup>22</sup>Ca gudé na' Jesús, ne benne' ca' dxusédene' belexezrine'  
lu xezre Betsaida, na' benne' Betsaida guleché'e tu benne'  
la chul-la lau Jesús, na' gulata' xuene' Le' guté' le'. <sup>23</sup>Jesús  
gudele' na' benne' la chul-la, ne bebéaje' le' dxu'a xezre. Na'  
btupe' zrene' lu xiaj lawe', ne guxrúa ne'e le'. Na' bchebe' le'  
chete dxel'é'ene'. <sup>24</sup>Benne' la chul-la gunné'e, na' gunné':

—Dxel'é'eda' benne' ca', zaj naque' ca weaj xaga, na' dxesí'aque'.

<sup>25</sup>Nadxa Jesús guxrúa ne'e xiaj lawe' da xula, na' benne'  
na' gunná dxgüe'. Na' bexaque', ne xúgute bache dxel'é'ene'  
cháwedau'. <sup>26</sup>Nadxa Jesús besel-le' le' lizre', dxe'e le':

—Quebe chu'u lu xezre nigá, ne quebe nu xu'u caní.

### Pedro dxenné' naca Jesús benne' nasel-la Dios

(Mt. 16.13-20; Lc. 9.18-21)

<sup>27</sup>Ca gudé na' Jesús, ne benne' ca' dxusédene' xjaque' lu  
xézredu ca' zaj nababa xezre Cesarea naga dxenná bea Filipo.  
Dxácaté zaj xu'e neza bchebe Jesús benne' ca':

—¿Nuzra na' dxelenná benne' naca' neda'?

<sup>28</sup>Belexechebe':

—Bal-la benne' dxelenné' nacu' Juan, bénnea' bchué'  
bénneache nisa. Benne' xula dxelenné' nacu' Elías, bénnea'  
bchálaje' waláz chee Dios. Benne' xula dxelenné' nacu' tu  
benne' xula bchálaje' waláz chee Dios.

<sup>29</sup>Nadxa Jesús bchebe' le':

—¿Gazra le'e? ¿Nuzra dxennale le'e naca' neda'?

Pedro gunné':

—Lue' nacu' Cristo, benne' nase-la Dios.

<sup>30</sup>Nadxa gunná be'e Jesús benne' ca'. Gunné':

—Quebe nu xele ca'.

### Dxuchalaj Jesús ca dxal-la' gatie'

(Mt. 16.21-28; Lc. 9.22-27)

<sup>31</sup>Nadxa guzú lau Jesús dxulé'ene' benne' ca' ca dxal-la' sáca'le'e Le', Benne' Gulje' Bénneache, ne ca xelún benne' gula chee judío ca', ne benne' xíchaje ca' chee bxruze ca', ne benne' dxuluxuzájle'e da nadxixruj bea Dios, xuluzúe' Le' chalá'ala. Nadxa guzre' le' welútie' Le', san xebane' zra guxunne zra.

<sup>32</sup>Da nigá guzre' le' caníqueze. Nadxa Pedro guché'e Jesús chalá'ala, ne guzú lawe' dxedil-le' Le'. <sup>33</sup>Jesús bexéchaje', ne gunné'e benne' ca' dxusédené', na' gudil-le' Pedro, dxé'e le':

—Gucuasa cuita' nigá, lue', da xriwe'. Quebe dxéquenu' da nigá ca dxun Dios. Ca dxun bénneache dxunu'.

<sup>34</sup>Nadxa Jesús gunné' benne' ca' dxusédené', ne xúgute bénneache ca', na' guzre' le':

—Che núlale dxaca lázrele gunle neda' tuze, dxal-la' guzúale chalá'ala xúgute da dxezá lázrele le'e, ne gácale ca tu benne' zéaje' chee te'e xaga béguaj, na' gunle neda' tu zren. <sup>35</sup>Che tu benne' dxaca lazre' guselé' xel-la nabán chee', benne' nigá gunitie' xel-la nabán chee'. Bénnea' gunitie' xel-la nabán chee' ne chia' neda', ne ne chee dizra' chawe' chia', benne' nigá guselé' xel-la nabán chee'. <sup>36</sup>Che tu benne' gape' xúgute da naca chee xezr la xu nigá, na' gunitie' bénne'du xu'e, ¿bízraqueze da ba neza gaca na chee bénnea'? <sup>37</sup>Quebe bi gaca gunezruj tu benne' chee guselé' bénne'du xu'e. <sup>38</sup>Che tu benne' gapa stu'e chia' neda', ne chee dizra' chawe' chia' lau bénne' caní, benne' dxulucá'ana Dios, ne dxelún dul-la, la gaze neda', Benne' Gulje' Bénneache, gapa stú'queza' chee bénnea' gate xida' nen xel-la szren chee Xra', ne nen gubáz chee xabáa lá'azxa ca'.

**9** <sup>1</sup>Cá'anqueze guzre Jesús benne' ca':

—Da li dxapa' le'e, zaj zra' nigá benne' quebe xelatie' nédxula ca xeelé'ene' xida xel-la dxenná bea chee Dios nen xel-la waca chee'.

### Ca guca gate bcha ca gunná' Jesús

(Mt. 17.1-13; Lc. 9.28-36)

<sup>2</sup>Ca gudé xrupa zra, guché Jesús Pedro, ne Jacobo, ne Juan, na' guxiájlēne' benne' canize tu lu xi'a sibe. Na' bcha ca gunná' Jesús lau benne' ca'. <sup>3</sup>Zra lana Jesús bexaca na chiche ca bezxe' da dxágutē na laudxu. Quegá nu chilá' benne' lu xēzr la xu gaca quibe' zra lane' chee xegá'ana na chiche ca guca zra lana Jesús. <sup>4</sup>Na' benne' ca' dxusede Jesús belelé'ene' Elías, ne Moisés, benne' gulate nédxudaute, dxuluchálajlēne' Jesús. <sup>5</sup>Pedro guzre' Jesús:

—Benne' wesede, cháwele'e naca zradxu nigá. Guntu' chunna xu'u lágadau', tu chiu', ne tu chee Moisés, ne tu chee Elías.

<sup>6</sup>Caní gunná Pedro lawe' da dxelezrebe benne' ca' dxusede Jesús, na' Pedro quebe nézene' ca da dxenné'. <sup>7</sup>Nadxa betaj tu beuj naga zaj zre'e, da bcache na le', na' lu beuj na' belenne' tu chi'i benne', gunné':

—Benne' nigá naque' Zri'ina' nazrí'ite lazra'. Le xen da dxenné'.

<sup>8</sup>Gate gulenné'e, québedxa nu nalá' nen le', san tuze Jesús.

<sup>9</sup>Dxácate dxelexétaje' lu xi'a na', gunná be'e Jesús benne' ca' quebe nu xuluchálajlēne' ca naca da belelé'ene' gate te na' xebán Benne' Gulje' Bénneache ládujla benne' gate. <sup>10</sup>Chee le na' gulezúe' zrize ca naca da ba guca. Buluchebe ljwezre':

—¿Bizra zéaje da na', xebane' ládujla benne' gate?

<sup>11</sup>Nadxa buluchebe' Jesús:

—¿Bizr chee na' dxelenná benne' ca' dxuluxuzájlē da nadxixruj bea Dios dxal-la' xelá' Elías nédxula ca Cristo?

<sup>12</sup>Bechebe Jesús, na' guzre' le':

—Da li xelá' Elías nedxu, ne gucá'ana chawe' xúgute. ¿Bizra dxenná da naxúaj na lu xiche chee Dios ca gaca chia' neda', Benne' Gulje' Bénneache? Dxenná na da zan da saca', na' xuluzúa bénneache neda' chalá'ala. <sup>13</sup>Neda' dxapa' le'e, ba bla' Elías, na' belunē' chee' ca naca xúgute da gulaca lazre' ca da dxenná na lu xiche chee Dios ca da dxal-la' gaca chee'.

### Dxexún Jesús tu benne' cuide' xu'ube' be' xriwe'

(Mt. 17.14-21; Lc. 9.37-43)

<sup>14</sup>Ca gudé na' belexezrine' naga zaj zra' xezícadxa benne' ca' dxusede Jesús, na' belelé'ene' benne' zan zaj naxéchaje'

le', ne zaj zráqueze na' benne' dxuluxuzájle'e da nadxixruj bea Dios, na' dxulutíl-lalene' le' dizra'. <sup>15</sup>Gate beledé'ene' Jesús, na' xúgute' belexebánene', na' gusí'aca chégüe' naga zua Jesús, ne bulugape' Le' diuzre. <sup>16</sup>Ca'an guca, Jesús bchebe' benne' ca':

—¿Bizra na' dxdedíl-lalele benne' ca'?

<sup>17</sup>Nadxa tu benne' ze' ga na' bechebe':

—Benne' wesede, nache'a zri'ina' nigá chee xexunu'-be' lawe' da xu'ube' be' xriwe' da ba nun na lebe' bi quebe dxaca nnebe'. <sup>18</sup>Gáteteze na' dxu'ube' da xriwe', na' dxel-la na lebe', ne dxin na lebe' lu xu. Dxezría bzrina' xú'abe', ne dxagu láxzabe'. Chee le' na' ba dxéxrujle'ebe'. Ba gunaba' benne' ca' dxusédenu' xelexebéaje' be' xriwe' na', san quebe gulezéquene'.

<sup>19</sup>Bechebe Jesús:

—Le'e, benne' quebe dxéajlele chia'. ¿Ájate dxal-la' súalena' le'e? ¿Ájate dxal-la' gaca' benne' zren lazre' nen le'e? Le cheajxrí' bi cuide' na' nigá.

<sup>20</sup>Na' xeaixxrí'e-be'. Gate be' xriwe' na' ble'e na Jesús, na' ben na gudel-la chuna' bi cuide' na', ne gudinna lebe' xu, na' dxeixre dxtétíl-labe' lu xu, ne guzría bzrina' dxú'abe'. <sup>21</sup>Nadxa bchebe Jesús xrabe':

—¿Bátate dxezácabe' caní?

Gunná xrabe':

—Gate nácatebe' bidau'. <sup>22</sup>Zane' lasa be' xriwe' na' dxugú'u na lebe' lu xi', ne lu nisa chee gute na lebe'. Che wazéquenu' bi gunu' cheebe', bexache lazre' netu', ne gúcale netu'.

<sup>23</sup>Na' guzre Jesús le':

—Che wazéquenu' lue' chéajle'u chia', xúgute wazeque chee benne' dxéajle'e chia'.

<sup>24</sup>Nadxa xra bi cuide' nigá gunné' zizraj:

—Dxéajle'a chiu'. Gúcale neda' chee chéajledxa'.

<sup>25</sup>Gate ble'e Jesús dxelezraga benne' zan, na' gudil-le' be' xriwe' na', dxenné':

—Lue', be' xriwe', dxunu' benne' quebe dxaca nnie', ne cuezru, neda' dxenná be'eda' lue' xedxúaju'. ¡Bsan bi cuide' nigá! ¡Québedxa xexú'u lu bel-la' dxen cheebe'!

<sup>26</sup>Na' be' xriwe' na' gudxezre xa'a na, ne ben na gudel-la chuna' bi cuide' na', na' bedxúaj na. Na' begá'anabe' ca tu benne' gate. Ca'an guca, gulenná benne' zan ca':

—Ba gútebe'.

<sup>27</sup>Nadxa gucá'a Jesús na'be', bechise'-be'. Na' benne' cuide' na' bezebe'.

<sup>28</sup>Nadxa guxú'u Jesús tu lu xu'u, na' benne' ca' dxusédene' buluchebe' Le' naga zue' tuze':

—¿Bizr chee na' quebe guzéquentu' netu' xebéajntu' be' xriwe' na'?

<sup>29</sup>Nadxa Jesús guzre' benne' ca':

—Ca naca be' xriwe' caní séquele xebéajle na che nábale lau Dios, ne gunle gubasa.

**Jesús dxuchálaje' da xula ca gaca gate gatié'**

(Mt. 17.22-23; Lc. 9.43-45)

<sup>30</sup>Gate besí'aque' naga zaj zre'e, na' belexedé' naga nababa Galilea. Jesús quebe guca lazre' nu neze ga zue', <sup>31</sup>lawe' da dxuzéajni'ine' benne' ca' dxusédene', na' guzre' le':

—Zua tu benne' gudé' neda', Benne' Gulje' Bénneache, lu na' benne' ca' dxeledábague' neda', na' xelútié' neda', san gate gaca chunna zra natia', na' xebana'.

<sup>32</sup>Benne' ca' quebe guléajni'ine' ca da dxé'e le', ne belezrebe' xuluchebe' Le'.

**Nu benne' naque' blau**

(Mt. 18.1-5; Lc. 9.46-48)

<sup>33</sup>Nadxa belezrine' lu xezre Capernaum, na' gate zaj zre'e lu xu'u na', bchebe Jesús benne' ca' dxusédene':

—¿Bizra dizra' dxutíl-lalele ljwézrele za'le la neza?

<sup>34</sup>Gulezré'e zrize lawe' da bulutil-le' dizra' la neza na' che nulé' nácadxe' benne' blau. <sup>35</sup>Nadxa Jesús gudxé'e, na' gunné' benne' chazrinnu, benne' ca' dxusédene', na' guzre' le':

—Che núlale dxaca lázrele gácale benne' blau, dxal-la' gácale ca benne' bzebe, ne gunle zrin chee xúgute' bénneache.

<sup>36</sup>Nadxa guqu'é tu bidau', na' bzue' lebe' gachaj lawe' benne' ca'. Na' bnide'-be', ne guzre' benne' ca':

<sup>37</sup>—Benne' na' gape' ba lál'ana tu bidau' ca bidu nigá lawe' da nazrí'ine' neda', bénnea' gape' ba lál'ana neda', na' bénnea' gape' ba lál'ana neda', quegá tuza' neda' gape' ba lál'ana, cá'anqueze gape' ba lál'ana Xra' nasele' neda'.

**Benne' quebe dxedábague' dxi'u, dxácalene' dxi'u**

(Lc. 9.49-50; Mt. 10.42)

<sup>38</sup>Nadxa Juan guzre' Jesús:

—Benne' Wesede, blé'entu' tu benne' dxebéaje' be' xriwe' da xu'u bénneache, dxuchínene' Lau' Lue', san bénnea' quebe

dxunē' dxi'u tu zren. Cheē lē na' gúzrentu' lē' québedxa gunē' ca'.

<sup>39</sup>Jesús guzrē' benne' ca' dxusédenē':

—Quebe bi xēl lē'. Che nu benne' gunē' tu xel-la waca, guchínene' La' neda', benne' nigá quebe gaca nne' schanni' chia'. <sup>40</sup>Caní naca na lawe' da benne' quebe dxedábage' dxi'u, dxácalene' dxi'u. <sup>41</sup>Núteteze benne' gunne' le'e tu zriga' nisa nē cheē La' neda' lawe' da nácale chia' neda', Cristo, da líqueze dxennía', wazí'queze' da dxal-la' si'ē.

### Ca naca da dxun na dxi'u benne' dul-la

(Mt. 18.6-9; Lc. 17.1-2)

<sup>42</sup>Gunnadxa Jesús:

—Núteteze benne' gul'éne' tu bidau' cheē gunbe' dul-la, bidu na' dxéajlēbe' chia', cháwedxa guchéajdxu tu xiaj zi'i lba bēnnea', ne cheajchú'unadxu lē' lu da situj cheē nísadau'. <sup>43</sup>Che na'u dxun na gunu' dul-la, wendxa guchugu na'u na'. Cháwedxa xexú'u xabáa naga gaca banu' nen tuze na'u quézcala xexíaju' lataj ba xa' nen dxúpatē na'u, naga quebe xexula xi' da xezacu'. <sup>44</sup>Lataj ba xa' na' quebe xelate bzuga', bē dxeláguba' benne' ca' dxelunē' da calēla, na' xi' na' cabata' xexúl-laqueze na. <sup>45</sup>Na' che ni'u dxun na gunu' dul-la, guchugu ni'u na'. Cháwedxa xexú'u xabáa naga gaca banu' nen tu ni'u, quézcala xexíaju' lataj ba xa' nen dxúpatē ni'u, naga quebe xexula xi'. <sup>46</sup>Lataj ba xa' na' quebe xelate bzuga', bē dxeláguba' benne' ca' dxelunē' da calēla, na' xi' na' cabata' xexúl-laqueze na. <sup>47</sup>Che xiaj lau' dxun na gunu' dul-la, guleaj xiaj lau' na'. Cháwedxa xexú'u naga dxenná bea Dios nen tuze xiaj lau', quézcala xexíaju' lataj ba xa' nen dxúpatē xiaj lau'. <sup>48</sup>Lataj ba xa' na' quebe xelate bzuga', bē dxeláguba' benne' ca' dxelunē' da calēla, na' xi' na' cabata' xexúl-laqueze na.

<sup>49</sup>'Ca dxundxu gate dxugú'udxu zede' bēla' da guzáladxu lu xi' cheē xegá'ana chawe' na, ca'an gaca cheē xúgutē benne'. Cá'anqueze dxugú'udxu zede' da dxuzézxedxu lau Dios. <sup>50</sup>Zede' na' naca na da chawe', san che xenite xel-la sna'a cheē na, ¿ájala gundxu cheē guchínedxu zede' na'? Le gaca le'e ca zede' chawe' na', ne le sua lu xel-la zri lázre' tule nen xetule.

### Ca naca cheē benne' dxexel'é'ē nen zru'ulē'

(Mt. 19.1-12; Lc. 16.18)

**10** <sup>1</sup>Nadxa bedxúaj Jesús xezre Capernaum, na' guxíaje' naga nababa Judea xechalá'a xēgu Jordán naga dxalaj gubizra. Na' belezraga bēnneache zan naga zua Jesús,

na' xecha lasa na' bsédene' le' cáqueze dxune'. <sup>2</sup>Nadxa bal-la benne' xudau' fariseo ca' belezrine' lau Jesús, na' buluchebe' Le' chee da gun nne' Le' tu da quebe dxal-la' nne'. Buluchebe' Le':

—¿Waca tu benne' xelé'e nen zru'ule'?

<sup>3</sup>Nadxa bechebe Jesús:

—¿Bizra gunná be'e Moisés le'e?

<sup>4</sup>Na' belexechebe benne' ca':

—Benna Moisés lataj gunézrujdxu zrú'uladxu tu xiche da dxenná na dxelá'adxu, na' gusandxu le'.

<sup>5</sup>Nadxa Jesús guzre' le':

—Caní gunná be'e Moisés lawe' da zaj naca zizraj lázrdaule le'e. <sup>6</sup>Gate nédxudau' gate ben Dios xúgute da dxelé'edxu, na' bene' bèneache benne' biu, ne nu'ula, na' gunné': <sup>7</sup>“Chee le na' benne' biu na' gusane' xruze xrne'e chee gaque' tuze nen zru'ule', <sup>8</sup>na' dxupe' xelaque' ca tuze benne'.” Ca' naca na, québedxa zaj naca chupe', san tuze benne' zaj naque'. <sup>9</sup>Chee le na' netú benne' quebe dxal-la' xelé'e da nuchaga Dios.

<sup>10</sup>Gate zaj zra' lu xu'u benne' ca' dxusede Jesús buluchebe' Le' xetú lasa ca naca chee da nigá. <sup>11</sup>Na' Jesús guzre' benne' ca':

—Che tu benne' xelé'e nen zru'ule', ne xezúalene' nu'ula xula, dxíchuje' xrba chee wechaga na' lawe' da dxusebague' zru'ule' nedxu na' dul-la. <sup>12</sup>Cá'anqueze che tu nu'ula gusane' benne' chee', ne xezúalene' benne' xula, la gázqueze dxíchuje' xrba chee wechaga na' da dxusebague' benne' chee' dul-la.

### Jesús dxenabe' Dios gun chawe'e bidu ca'

(Mt. 19.13-15; Lc. 18.15-17)

<sup>13</sup>Nadxa bèneache ca' guleché'e bidu chee' ca' lau Jesús chee xrua ne'e lebe', na' benne' ca' dxusede Jesús gulezú lawe' dxeledil-le' benne' ca' zaj naché'e bidu ca'. <sup>14</sup>Gate ble'e Jesús da dxelune', na' bzre'e, ne guzre' le':

—Le güe bidu ca' lataj xeledá'abe' naga zua'. Quebe guzágale-be' lawe' da benne' zaj naque' ca bidu caní xelu'e naga dxenná bea Dios. <sup>15</sup>Da li dxapa' le'e, che tu benne' quebe gape' ba lánana da dxenná bea Dios ca dxelún bidu caní, cabata' chu'u bènea' naga dxenná bea Le'.

<sup>16</sup>Nadxa gucá'a Jesús bidu ca', ne bnide'-be'. Guxrúa ne'e lebe', na' gunabe' Dios gun chawe'e-be'.

**Benne' cuide' nape' da gunní'a dxuchálajlene' Jesús**

(Mt. 19.16-30; Lc. 18.18-30)

17 Gate bexú'u Jesús neza, na' guzá chegu tu benne' biu, na' bzu zribe' lau Jesús, ne bchebe' Le':

—Benne' xrlátaje, bi dxal-la' guna' chee gapa' xel-la nabán zeajlí canna?

18 Jesús guzre' le':

—¿Bizr chee na' dxu'u neda' xrlátaje? Québedxa nu chilá' naca xrlátaje. Tuze Dios naque' xrlátaje. 19 Núnbeaquezu' ca da bdxixruj bea Dios gate na' gunné':

Quebe quichju' xrba chee wechaga na'.

Quebe gutiu' benne'.

Quebe cuanu' chee benne'.

Quebe nneu' chee nu benne' da quebe naca na.

Quebe gagu lanu'.

Gudapa ba lá'ana xra xrna'u.

20 Nadxa bénnea' bechebe':

—Benne' wesede, xúgute da caní dxuna' nácatea' bidau'.

21 Na' Jesús gunné'e le' xrtandau', ne guzre' le':

—Tu da dxexájrjenu'. Guxíaj xeajete xúgute da napu', na' bnezruj benne' xache' ca' dumí chee na. Nadxa gapu' da gunní'a xabáa. Na' gudá, gacu' ca tu benne' zéaje' chee te'e xaga béguaj, ne ben neda' tuze.

22 Gate bene' da nigá, na' benne' cuide' na' bewi'ine lázrele'e, na' bexíaje' dxewí'ine' lawe' da nácale'e benne' gunní'a.

23 Nadxa Jesús gunné'e ni naze, na' guzre' benne' ca' dxusédene':

—Stébetē naca chu'u benne' gunní'a naga dxenná bea Dios.

24 Belexebánele'e benne' ca' dxusede Jesús ca naca dizra' gunná Jesús, na' Le' guzre' le' xetú lasa:

—Zrí'ina'dau', stébetē naca xelú'u naga dxenná bea Dios benne' dxuluxrén lazre' xel-la gunní'a. 25 Chadidxa te tu bea zren lu negue xeché' quézcala chu'u tu benne' gunní'a naga dxenná bea Dios.

26 Gate belén benne' ca' dizra' nigá, na' belexebánele'ene', na' buluchebe ljwezre':

—¿Núzraqueze la xca'?

27 Jesús gunné'e benne' ca', ne guzre' le':



—Quebe seque' nu bēne' gunē' da nigá, san Dios wazéqueñe'. Quebe bi de da quebe gaca gun Dios.

<sup>28</sup>Nadxa Pedro guzre' Jesús:

—Xránantu', netu' ba bcá'anantu' xúgute da nápanantu', ne zéajlentu' Lue'.

<sup>29</sup>Na' bechebe Jesús:

—Da li dxapa' le'e, núteteze benne' gusane' lizre', u benne' biche', u nu'ula zane', u xre', u xrne'e, u zru'ule', u zrí'ine', u xezr la xu chee' ne chia' neda', u ne chee dizra' chawe' chia', <sup>30</sup>benne' nigá si'e na'a lu xezr la xu nigá tu gaxúa cue' ca' da si'e, xu'u ca', ne benne' biche' ca', ne nu'ula zane' ca', ne xrne'e ca', ne xezr la xu chee' ca', na' weláu zi' xúzrequeze bēneache le'. Lu xezr la xu da za za' wazí'queze' xel-la nabán zeajlí canna. <sup>31</sup>Zánete benne' zaj naca na'a benne' blau xelaque' ca' benne' bzebe, na' zánete benne' zaj naca na'a ca' benne' bzebe xelaque' benne' blau.

### **Dxuchalaj Jesús xetú lasa ca gaca gate gatie'**

(Mt. 20.17-19; Lc. 18.31-34)

<sup>32</sup>Gate zaj xu'e neza dxelegüene' zjaque' Jerusalén, na' Jesús zria lawe' lau benne' ca' dxusédene'. Dxelezrebe benne' ca', ne lu xel-la dxelezrebe zjácälene' Le'. Na' da xula gucá'a Jesús benne' chazrinnu ca' dxusédene', na' guzú lawe' dxe'e le' ca' naca da dxal-la' gaca chee'. <sup>33</sup>Na' guzre' le':

—¡Le na' xque nigá! Dxegüendxu zéajdxu Jerusalén naga tu benne' gudée' neda', Benne' Gulje' Bēneache, lu na' benne' xíchajē ca' chee bxruze ca', ne lu na' benne' dxuluxuzájle'e da nadxixruj bea Dios, na' xelechugue' chia' chee gatia', na' wuludee' neda' lu na' benne' zitu' ca'. <sup>34</sup>Nadxa xelún le' chia' neda', ne xelu'e neda', ne xuluzré'e neda' zrene', na' xelutie' neda'. Gate gaca chunna zra xebana' ládujla benne' gate.

### **Jacobo ne Juan dxelenabe' Jesús bi gunē' chee'**

(Mt. 20.20-28)

<sup>35</sup>Nadxa Jacobo ne Juan, zri'ine Zebedeo, belezrine' lau Jesús, na' gulé'e Le':

—Benne' Wesede, dxaca lázrentu' gunu' cheentu' da nábantu' Lue'.

<sup>36</sup>Nadxa bchebe Jesús le':

—¿Bi dxaca lázrele guna'?

**37**Na' belexechebe' Le':

—Benna netu' lataj cué'entu', tuntu' chalá'a xabela chiu', ne xetuntu' chalá'a xéglala chiu' naga nna be'u xabáa chiu'.

**38**Na' guzre Jesús le':

—Le'e quebe nézele da dxenábale. ¿Waca xí'ajle le'e da na' xi'aj neda', da zéaję na ca naca da sácadxu? ¿Waca chuale nisa ca chua' neda' nisa lu xel-la gute?

**39**Le' belexechebe':

—Wácantu'.

Na' Jesús guzre' le':

—Da li wé'ajle ca naca da na' xi'aj neda', ne chuale nisa ca chua' neda' nisa. **40**Chee cué'ele chalá'a xabela chia' u chalá'a xéglala chia', quegá neda' gunna' na. Gaca chee benne' ca' ba nucueza Dios chee'.

**41**Gate xechí benne' ca' dxusęde Jesús belenne' na, na' belezré'e nen Jacobo ne Juan. **42**Jesús gunné' benne' ca', na' guzre' le':

—Ba nézquezle ca dxelún benne' dxelenná be'e benne' xęzr la xu ca'. Dxelún cuine' xrane benne' xęzr la xu ca'. Benne' blau ládujla le' dxezi'e ba neza xel-la dxenná bea chee'. **43**Quebe gaca caní ládujla le'e. Che nu benne' dxaca lazre' gaque' benne' blau ládujla le'e, benne' nigá dxal-la' gunę' zrin chee ljwezre', **44**na' che nu benne' ládujla le'e dxaca lazre' gaque' benne' xíchaję, benne' nigá dxal-la' gaque' ca tu benne' nada'u chee gunę' zrin chee xúgute ljwezre'. **45**Caní gaca na lawe' da cá'anqueze neda', Benne' Gulje' Bénneache, bla'a, quegá chee xelún bénneache zrin chia' neda'. Bla'a chee guna' zrin chee bénneache, ne chee guzúa' xel-la nabán chia' chee guselá' benne' zan.

### **Dxexún Jesús tu benne' la chul-la le' Bartimeo**

*(Mt. 20.29-34; Lc. 18.35-43)*

**46**Nadxa belezrine' xęzre Jericó. Gate na' bedxúaj Jesús xęzre nigá nen benne' ca' dxusędene', ne nen benne' zante, na' zua tu benne' la chul-la le' Bartimeo, zri'ine Timeo, dxe'ę dxu'a neza dxenabe' guna'. **47**Na' ca bénne' dxedé Jesús, benne' Nazaret, ga na', na' benne' la chul-la nigá guzú lawe' dxenné' zizraj:

—¡Jesús, Zri'ine David, bexache lazre' neda'!

**48**Benne' zan ca' guledil-le' le' chee sue' zrize, na' le' zízrajdxa gunné':

—¿Zri'ine David, bexache lazre' neda!

<sup>49</sup>Nadxa gugá Jesús, na' gunné':

—Le nne le'.

Na' gulenné' benne' la chul-la na', gulé'e le':

—Bdipa lazru'. Guxasa lawe' da dxenné' lue'.

<sup>50</sup>Nadxa bzale' lazxe' naxrúa cuzre' chalá'ala, na' guxritie' chee zrine' lau Jesús. <sup>51</sup>Nadxa Jesús gunábene' le':

—¿Bizra dxaca lazru' guna' chiu'?

Na' gunná benne' la chul-la:

—Benne' Wesede, dxaca lazra' xexunu' xiaj lawa'.

<sup>52</sup>Na' Jesús guzre' le':

—Waca xexíaju'. Bache bexacu' lawe' da guxéajle'u chia'.

La ble'ete' benne' la chul-la na', na' guxíajlene' Jesús la neza.

### Dxu'u Jesús xezre Jerusalén

(Mt. 21.1-11; Lc. 19.28-40; Jn. 12.12-19)

**11** <sup>1</sup>Gate belezrine' gáguze naga dxe' xezre Jerusalén, ne zaj xu'e la neza naga zaj dxe' xezre Betfagé, ne xezre Betania zran xi'a chee xaga olivo ca', na' Jesús gusel-le' chupa benne' ca' dxusédené', <sup>2</sup>na' guzre' le':

—Le hjaca lu xézredau' da dxe' tu chi na', na' gate zrinle na', cheajxrácale tu burro da'ba' xaga, bea na' netú benne' quebe ne cuié' le'ba'. Le sezure-ba', ne le che'-ba' nigá. <sup>3</sup>Che nu benne' nabé' le'e bizr chee na' dxesézrele-ba', xégale le': “Xránadxu dxechine'-ba'”, na' la xesél-la'te' le'ba'.

<sup>4</sup>Nadxa xjaque', ne xejlexraque' burro na' da'ba' xaga dxu'a dxa xu'u cuita neza, na' guleséze'-ba'.

<sup>5</sup>Nadxa bal-la benne' zaj zre'e na' gulé'e le':

—¿Bizra' dxunle? ¿Bizr chee na' dxesézrele búrrua'?

<sup>6</sup>Nadxa le' gulé'e benne' ca' ca ba gunnáqueze Jesús, na' belúe' le' lataj. <sup>7</sup>La belexeché'ete' búrrua' lau Jesús, na' buluzríe' zra lané' cúzruba', na' guzría Jesús le'ba'. <sup>8</sup>Benne' zante gulechíluje' xicha chee', ne xladxe' la neza, na' benne' xula gulechugue' zina' da gulíxrue' la neza.

<sup>9</sup>Na' benne' ca' zaj zrie' lawe', ne benne' ca' zjaque' bzebe, gulezú lawe' dxelenné' zizraj:

—¿Gaca ba! ¡Lá'azxa naca benne' ze'e, nasel-la Xránadxu Dios Le'! <sup>10</sup>¡Lá'azxa naca xel-la dxenná bea da za', xel-la dxenná bea chee xradxu David! ¡Gaca ba Dios!

<sup>11</sup>Ca'an guca gate na' guxú'u Jesús xezre Jerusalén, na' guxú'e lu xudau'. Ca gudé gunné'e xúgute da zaj nnita du cuitē', na' bezé'e zexíaje' xezre Betania nen benne' chazrinnu ca' dxusédene', lawe' da ba zeaj dxezré'.

### Jesús dxugu'e de' xaga higo

(Mt. 21.18-19)

<sup>12</sup>Gute xu zra xula gate na' gusá'aque' xezre Betania, gudún Jesús. <sup>13</sup>Na' blé'ene' zítu'la dxe' tu xaga higo zria na laga', na' xeajnné'e che zria da zixre lu xaga na', san quebe bi zria na. Lágage zria na lawe' da quebe ne zrin zra cuía na da zixre.

<sup>14</sup>Nadxa Jesús guzre' xaga higo na':

—Cabátadxa nu gagu da zixre chiu'.

Benne' ca' dxusede Jesús belénqueze' na.

### Jesús dxexún lbe'e lu xudau'

(Mt. 21.12-17; Lc. 19.45-48; Jn. 2.13-22)

<sup>15</sup>Ca gudé na' belexezrine' xezre Jerusalén. Ca guxú'u Jesús lu xudau', guzú lawe' dxulague' lu xudau' benne' zaj zre'e wete, ne benne' zaj zre'e wewa'u na'. Na' bdxixre' blaga chee benne' weche'e dumí chee benne' zitu', ne bdxixre' naga dxelebé' benne' wete bgúgudu ca'. <sup>16</sup>Quebe be'e lataj nu benne' xudé' xua ca' lu xudau'. <sup>17</sup>Nadxa bsédene' bènneache ca', dxenné':

—Lu xiche lá'azxa dxenná Dios: “Lizra' gaca na tu xu'u naga xuluchálajle Dios benne' zá'aque' xúgute xezre.” Le'e ba nunle lizra' ca tu lizre benne' gubán ca'.

<sup>18</sup>Na' benne' xíchaje ca' chee bxruze ca', ne benne' dxuluxuzájle'e ca da nadxixruj bea Dios belenne', na' gulezú lawe' dxelexíluje' ajala gaca xelútete' Jesús lawe' da dxelezrebe' Le'. Ca'an guca lawe' da dxelexebane xúgute bènneache ca naca da dxusede Jesús le'. <sup>19</sup>Ca gula chizrela, Jesús bezé'e lu xezre.

### Dxebizre xaga higo

(Mt. 21.20-22)

<sup>20</sup>Ca gula zra xula che zílala, na' Jesús, ne benne' ca' dxusédene' belexedé'e na', na' belelé'ene' xaga higo na', ba nabizre na dutē lue na. <sup>21</sup>Nadxa xeajsá lazre Pedro, na' guzre' Jesús:

—Benne' wesede, gunná'xque xaga higo nigá da gulú'u na de'. Bache gubizre na.

**22** Jesús gunné':

—Le cheajlí lazre Dios. **23** Da li dxapa' le'e, che nútetezele nnale, xe le xi'a nigá: “Cuasa lue' nigá, xeajchú'u lu nísadau'”, ne che quebe dxun chupa lázrele, na' chéajlele waca da ba gunnale, na' gácaqueze na. **24** Chee le na' dxapa' le'e, xúgute da nábale Dios gate dxuchálajlele Le', che chéajlele ba guzile na, ca'an gácaqueze. **25** Gate na' dxuchálajlele Dios, che dxezrá'ale nu benne', le gunité lau chee bénnea' chee cá'anqueze Xrale zue' xabáa gunité lawe' dul-la da nabágale. **26** Che quebe gunité laule chee bénnea', Xrale zue' xabáa quebe gunité lawe' dul-la da nabágale.

### Ca naca xel-la dxenná bea da napa Jesús

(Mt. 21.23-27; Lc. 20.1-8)

**27** Nadxa belexezrine' xezre Jerusalén, na' ca dxedá Jesús le'aj xudau', na' gulebiga lau Le' benne' xíchajé ca' chee bxruze ca', ne benne' dxuluxuzájle'e da nadxixruj bea Dios, ne benne' gula ca'. **28** Na' benne' caní gulénabene' Jesús:

—¿Bizra xel-la dxenná bea napu' dxunu' da caní? ¿Nuzra benna lue' xel-la dxenná bea nigá?

**29** Na' bechebe Jesús:

—Cá'anqueze neda' de tu da nábeda' le'e. Che xechébele chia', nadxa xapa' le'e ca naca xel-la dxenná bea da napa' dxuna' da caní. **30** ¿Nuzra gusel-la Juan bchue' bénneache nisa? ¿Dios che bénneache? Le xechébe na'a.

**31** Nadxa gulezú lau benne' ca' dxuluchálaje' leze', dxelé ljwezre':

—Che xedxu Le', Dios gusel-le' le', na' nnáqueze': “¿Bizr chee na' quebe guxéajlele chee'?” **32** Che nnadxu bénneache gulesel-le' le', dxal-la' zrédexu da xelún benne' xezre ca'.

Caní gulenné' lawe' da xúgute benne' xezre nigá dxeléajle'e guca Juan benne' bchálaje' waláz chee Dios. **33** Ca'an guca, gulenná benne' ca', dxelé'e Jesús:

—Quebe nézentu'.

Nadxa gunná Jesús, dxé'e le':

—Cá'anqueze neda' quebe nnia' ca naca xel-la dxenná bea da napa' dxuna' da caní.

Da dxulé'e na ca naca chee benne' wen zrin quebe zaj naque' xrlátaje  
(Mt. 21.33-46; Lc. 20.9-19)

**12** <sup>1</sup>Nadxa guzú lau Jesús dxuchálajlene' benne' ca' tu da dxulé'e na. Dxe'e le':

—Zua tu benne' bde'e lba uva ca' lu xezr la xu chee', na' bene' le'aj chee na. Bene' tu xiaj lutju naga guchuchuje' uva ca', ne bene' tu bdupa' naga cue' benne' guxúe' da caní.

'Nadxa bdee' xezr la xu chee' na' lu na' benne' wen zrin ca' chee xelune' la'a lina chee na, na' guzé'e zéaje' xezre zitu'. <sup>2</sup>Ca gula zra chee lina, na' gusel-le' tu bi wen zrin chee' cheajxezri'ibe' lu na' benne' wen zrin ca' ca naca lina da dxal-la' xezí' benne' xranbe'. <sup>3</sup>Na' benne' wen zrin ca' gulel-le'-be', ne buluzalje'-be', na' belexesel-le'-be' dáchezebe'. <sup>4</sup>Nadxa xránabe' gusel-le' bi wen zrin xula, na' bi nigá belú'e-be' xiaj, ne gulelé'e xíchajbe', ne bulucháchalene'-be'. <sup>5</sup>Na' xránabe' na' gusel-le' xetube', na' bi nigá belútete' benne' ca' lebe'. Ca gudé na' xránabe' gusel-le' bi zandxa bi xula, na' cá'aqueze belú'e bál-labe', ne belútete' xebál-labe'.

<sup>6</sup>Xránabe' zua tu zrí'ine' bi biu, bi nazrí'ile'ene', na' naga bzébeté gusel-le' zrí'ine' nigá, dxenné' lu xichaj lázrdawe': Dخال-la' xelape' ba lál'ana zri'ina'. <sup>7</sup>Benne' wen zrin ca' gulenné', dxelé' ljwezre': “Bi nigá gueque cheebe' xezr la xu nigá. Gútetedxu-be' na'a, na' dxi'u xegá'analedxu da nigá.” <sup>8</sup>Ca'an guca, gulel-le'-be', ne belútete'-be', na' gulebéaje' bel-la' dxen cheebe' lu xezr la xu na'.

<sup>9</sup>Nadxa Jesús gunábene' benne' xudau' ca':

—¿Ajazra gun xrane xezr la xu nigá? Walé'e, na' gútete' benne' wen zrin ca', na' gudée' xezr la xu chee' lu na' benne' xula ca'. <sup>10</sup>Ba blábale da naxúaj na lu xiche chee Dios. Dxenná na:

Xiaj na' da quebe buluchine benne' wen xu'u,  
xiaj na' naca na'a xiaj blau chee xu'u.

<sup>11</sup>Da nigá ben Xránadxu, na' dxexebánedxu chee na.

<sup>12</sup>Nadxa gulaca lazre' xelél-le' Jesús lawe' da zaj nézene' bchálaje' da dxulé'e nigá chee gulé'ene' ca zaj naca le'. Quebe bi gulune' lawe' da gulezrebe' bi xelún benne' xezre ca'. Chee le' na' bulusane' Jesús, besí'aque'.

**Da bchalaj Jesús chee da dxuchizruj xu'u lawe'**

(Mt. 22.15-22; Lc. 20.20-26)

<sup>13</sup>Ca gudé na' gulesel-le' lau Jesús bal-la benne' xudau' fariseo, ne benne' zaj de'e Herodes chee gulebéaje' Le' dizra'

chee xelezéqueñe' xelawe' Le' zria. <sup>14</sup>Benne' caní belelé'e lau Jesús, na' gulé'e Le':

—Benne' wesede, ba nézentu' ca dxennáu' da li, ne quebe dxezí'u ca da dxelennaze bènneache, lawe' da quebe dxennáu' Lue' ca zaj naca cúzreze bènneache. Da li naca ca dxusédenu' bènneache da naca chee Dios. ¿Dxunna da nadxixruj bea Dios lataj quízrujdxu da dxuchizruj benne' dxenná bea Roma dxi'u, che cabí? ¿Dxal-la' quízrujdxu, che quebe quízrujdxu?

<sup>15</sup>Jesús dxéquebe'ene' quegá du lazre' dxelenábene' Le' da nigá, na' guzre' le':

—¿Bizr chee na' dxebéajle neda' dizra'? Le dajguá nigá tu dumí da dxízrujle chee le'eda' na.

<sup>16</sup>Na' bedajlegüé'e na, na' ca ble'e Jesús le na, na' gunábene' le':

—¿Nu lau da' dumí nigá, ne nu la naxúaj na nigá?

Na' gulé'e Le':

—Chee benne' dxenná bea Roma.

<sup>17</sup>Nadxa Jesús guzre' benne' ca':

—Le gunezruj chee benne' dxenná bea Roma da naca chee', na' le gunezruj chee Dios da naca chee Dios.

Na' belexebánene' ca naca da bchalaj Jesús.

### Da bchalaj Jesús ca xelexebán benne' gate

(Mt. 22.23-33; Lc. 20.27-40)

<sup>18</sup>Nadxa belezrín lau Jesús bal-la benne' xudau' saduceo. Benne' caní dxelenné' quebe xelexebán benne' gate. Ca'an guca, gulenábene' Jesús caní:

<sup>19</sup>—Benne' wesede, Moisés bzuaje' cheedxu da nadxixruj bea nigá: “Che tu benne' biu gatié', ne xegá'ana zru'ule', na' quebe nu zua bi chee bènnea', na' benne' biche' dxal-la' xequé'e nu'ula na' gute benne' chee' chee sua zri'ine bènnea' gutié'.”

<sup>20</sup>Gulezrá' gazre benne' biche'. Benne' nedxu bchaga na'abe', na' gútebe' quebe nu zrí'inebe' zua. <sup>21</sup>Na' benne' gudxupe' bequé'e nu'ula na', na' cá'anqueze gutié' quebe nu zrí'ine' zúaqueze. Cá'anqueze guca chee benne' guxunne'. <sup>22</sup>Ca'an guca, benne' gazre caní gulezúalene' nu'ula na', na' netue' quebe nu zrí'ine' guzúa. Naga xeajsete na gútete nu'ula'. <sup>23</sup>Na'a xca', gate na' xelexebán benne' gate, ¿nula benne' biu caní gaque' benne' chee nu'ula na', lawe' da gulezúale benne' gazre ca' le'?

<sup>24</sup>Nadxa Jesús guzre' benne' ca':

—Nanítele le'e lawe' da quebe núnbeale da naxúaj na lu xiche chee Dios, ne quebe nézele ca naca xel-la waca chee Dios. <sup>25</sup>Gate na' xelexebán benne' gate, québedxa xuluchaga ne'e, ne québedxa xuluchaga na' bi nu'ula ca'. Xelaque' ca zaj naca gubáz chee xabáa. <sup>26</sup>Na'a, ca naca chee benne' gate che xelexebane', ¿quebe ne gulábale ca da naxúaj na lu xiche chee Moisés ca gunná Dios gate na' bchálajlene' Moisés tu lu xágadau' da dxala xi'? Gunná Dios caní: “Neda' naca' Dios chee Abraham, ne chee Isaac, ne chee Jacob.” <sup>27</sup>Dios naque' Dios, quegá chee benne' gate ca'. Naque' Dios chee benne' ban ca'. Ca'an naca, álega nanítele le'e.

### Da nadxiruj bea Dios da naca blau

(Mt. 22.34-40)

<sup>28</sup>Na' zéqueze tu benne' dxuxuzájle'e da nadxiruj bea Dios, na' benne' da dxuchalaj Jesús, ne nézene' bzri'e dizra' chawe', na' gunábene' Le':

—¿Bizra da nadxiruj be'e Dios naca na da blaudxa?

<sup>29</sup>Na' Jesús guzre' le':

—Da bdxiruj be'e da naca na da blaudxa ca xúgute dxenná na caní: Le xene benne' Israel. Xránadxu Dios tuze naque'.

<sup>30</sup>Bzri'i Xranu' Dios du lazru', ne nen dute bénne'du xu'u, ne nen dute xichaj lázrda'u, ne nen dute xel-la wal-la da napu'.

Da nigá naca da nadxiruj bea da blaudxa, <sup>31</sup>na' da nadxiruj bea gudxupe' nácaqueze na ca le na, da dxenná na caní: Bzri'i benne' xula ca nazrí'i cuinu'. Quebe zua xetú da nadxiruj bea da naca blaudxa ca da chupa caní.

<sup>32</sup>Nadxa gunná bénnea' dxuxuzájle'e da nadxiruj bea Dios, dx'e Jesús:

—Ca'an xanne naca ca bechebu', Benne' dxusede. Da li naca ca dxennáu'. Zua tuze Dios, ne quebe nu zua xetú ca Le', <sup>33</sup>na' che zri'idxu Dios du lázredxu, ne nen dute xichaj lázrdaudxu, ne nen dute bénne'du xú'udxu, ne nen dute xel-la wal-la da nápadxu, ne che zri'idxu benne' xula ca nazrí'i cuínadxu, da caní zaj zácadxa na ca xúgute be xixre' ca' dxútedxu-ba' lau Dios, ne ca xúgute da dxuzéxedxu lu cugu chee Dios.

<sup>34</sup>Nadxa Jesús, ca benne' bchálaje' chawe', na' guzre' le':

—Xeláteze ne de na chee nna bea Dios xichaj lázrda'u.

Na' québedxa nu bexazre nábene' Le' dizra' ca'.



**¿Nu zrí'ine' naca Cristo?**  
(Mt. 22.41-46; Lc. 20.41-44)

**35** Jesús dxusédene' benne' ca' lu xudau', na' gunné':  
—¿Bizr chee na' dxeleenná benne' dxuluxuzájle'e da  
nadxixruj bea Dios naca Cristo zrí'ine David? **36** David ná'queze  
ca bzéajni'i Be' Lá'azxa le', gunné':  
Xránadxu Dios guzre' Xrana':  
“Gudxé'le chalá'a xabela chia',  
ca zrin zra ba nuzúa' benne' dxeledábague' lue',  
chee na be'enu' le'.”  
**37** Che David ná'queze dxenné': “Xrana’”, ¿ájala chee na'  
naque' zrí'ine'?  
Benne' zan ca' du lazre' buluzé nague' chee'.

**Jesús dxulé'ene' zaj nachixre benne' ca' dxuluxuzájle'e da  
nadxixruj bea Dios**  
(Mt. 23.1-36; Lc. 11.37-54; 20.45-47)

**38** Ca dxuséde Jesús benne' ca', na' gunné':  
—Le gapa chi'i cuínale chee benne' ca'an dxuluxuzájle'e  
da nadxixruj bea Dios. Benne' caní dxeledánene' dxelácue'  
zra lane' tunna, ne dxeledánene' xulugapa bénneache le'  
diuzre nen dizra' ba lá'ana lau bénneache ca'. **39** Benne' caní  
dxeledánene' dxelebé'e lataj blau lu xu'u naga dxelezraga  
benne' dxelúe lá'ane' Dios, ne dxeledánene' dxelebé'e lataj  
blau naga dxelawe' xrche'. **40** Benne' caní dxelegü'e lizre xrlataj  
nu'ula ca' ba gulate benne' chee', na' chee xululé'e cuine' ca'  
benne' xrlátaje, dxelune' xel-la dxuluwizraj Dios tunna. Le' zaj  
nabágadxé' zria.

**Dumí da gulú'u nu'ula xache' ba gute benne' chié'**  
(Lc. 21.1-4)

**41** Tu lasa gate na' dxe' Jesús lu xudau' cuita naga dxelegú'e  
dumí, na' dxenné'e ca dxelún benne' ca' dxelegú'e dumí, ne ca  
dxelún benne' gunní'a ca', dxelegú'e dumí zren. **42** Ca'an guca,  
bzrin tu nu'ula xache' ba gute benne' chié', na' gulu'e chupa  
dumí lásedau' da quebe zaj zácate can. **43** Nadxa gunné Jesús  
benne' ca'an dxusédene', na' guzre' le':  
—Da li dxapa' le'e, nu'ula xache' nigá bnézrujdxé' ca xúgute  
benne' ca'an gulegú'e dumí. **44** Xúgute benne' ca' gulegú'e da

québedxa dxelechínne'. Nu'ula xache' nigá gulu'e ca naca da nape', da nunte gawe'.

**Dxuchalaj Jesús ca gaca gate xrinnaj xudau'**

(Mt. 24.1-2; Lc. 21.5-6)

**13** <sup>1</sup>Gate bedxúaj Jesús lu xudau', na' tu benne' dxusédenē' guzre' Le':

—Benne' Wesede, gunná'xque ca zren naca xudau', ne xiaj xrtante caní.

<sup>2</sup>Bechebe Jesús:

—¿Dxelé'enu' na'a ca zren naca xudau' nigá? Québedxa xegá'ana tu xiaj cuzru ljwezre nigá. Ca naca xudau' nigá wabía xí'queze na.

**Da xelunna bea na gate cheajsé chee xezr la xu nigá**

(Mt. 24.3-28; Lc. 21.7-24; 17.22-24)

<sup>3</sup>Nadxa xjaque' lu xi'a chee xaga olivo ca', da zua na chalá'a ca li dxa xu'u xudau'. Gate dxe' Jesús ga na', na' Pedro, ne Jacobo, ne Juan, ne Andrés gulé'e Jesús leze':

<sup>4</sup>—Dxaca lázrentu' gulé'enu' netu' bata gaca caní. ¿Bizra da ca' xelunna bea na gaca xúgute da caní?

<sup>5</sup>Na' bechebe Jesús:

—Le gapa chi'i cuínale chee quebe nu si xe le'e, <sup>6</sup>lawe' da xeledá' benne' zante xelún lu'a neda', welenné' zaj naque' Cristo, na' welezí xe'e benne' zante.

<sup>7</sup>Le'e, gate xénele gaca wedil-la, ne ba dxaca wedil-la, quebe zrébele. Cá'queze dxal-la' gaca na, san quegá ne zrin zra cheajsé chee na, <sup>8</sup>lawe' da xeledíl-lale benne' tu xezr la xu benne' xetú xezr la xu, na' tu xezre benne' tíl-lale na xetú xezre. Wazrú' zánete xezre, ne wata' gubina', ne wadxé'e na zraga bénneache. Da caní zaj naca na naga su lauze ca naca da xelezaca zi' bénneache.

<sup>9</sup>Le guxúe cuínale lawe' da xuludée' le'e lu na' benne' xu'u lawe', na' xuluzalje' le'e lu xu'u naga dxulucá'ana szrene' Dios. Xuludée' le'e lau benne' xu'u lawe' ca', ne lau benne' dxelenná be'e lawe' da nácale chia' neda'. Gate ca'an gaca, na' guchálajle chia' neda' lau benne' ca'. <sup>10</sup>Nédxudxa ca zrin zra cheajsé chee na, dizra' chawe' chia' gaca lban chee na lau bénneache zaj zre'e xúgute xezr la xu. <sup>11</sup>Gate xeleché'e le'e chee xuludée' le'e lu na' benne' xu'u lawe' ca', quebe cue'le gunne xue bi nnale,

ne quebe quilaj lázrele ájala guchálajle. Nnele ca da gunna Dios le'e zra na' lawe' da quegá le'eze nnele, san Be' Lá'azxa, Le' nne'. <sup>12</sup>Ca xelún bènneache lu zra na', xuludé'e' bi biche' ca' lu na' benne' xelúti'e' lebe'. Cá'anqueze xelún xruze xrna' ca', xuludé'e' zrí'inequeze'. Na' zrí'ine' ca' weledábagabe' xruze xrnabe', ne xelunbe' xelátie'. <sup>13</sup>Xúgute bènneache xezezré'e le'e lawe' da nácale chia' neda'. Bénnea' ze tipe' ca zrindxa zra cheajsé chee na, la bènnea'.

<sup>14</sup>'Daniel, bènnea' bchálaje' waláz chee Dios bzuaje' ca naca chee da sban da guzría xi na. Gate lé'ele le'e zria da nigá lataj lá'azxa naga quebe dxal-la' cuía na, nadxa benne' zaj zre'e xezre ca' zaj nababa xezr la xu Judea dxal-la' xuluzrúnnuje', ne chjaque' lu xi'a zren. (Benne' dxulabe' da nigá dxal-la' cheajní'ine' da naca chee na.) <sup>15</sup>Nu benne' zria chju'u lizre' lu zra na' quebe dxal-la' xexétaje' chee bi xebéaje' lu xu'u. <sup>16</sup>Benne' ze le'e xixre' quebe dxal-la' xezrine' lizre' chee xequé'e zra lane'. Dخال-la' xuluzrúnnujte benne' caní. <sup>17</sup>Baxache' xelaca nu'ula zaj zue' zi'i, ne nu'ula ca' zaj nuxre' bidu dxe'ene lu zra na'. <sup>18</sup>Le naba lau Dios chee quebe gaca beu' zaga gate na' dxal-la' guzrúnnujle, <sup>19</sup>lawe' da xelezaca zidxa bènneache lu zra ca'an ca da quebe ne xelezácate', gulala ben Xránadxu Dios xezr la xu nigá, ne québedxa xelezácadxe' ca'. <sup>20</sup>Che Xránadxu Dios quebe guzáchie' zra ca', québedxa nu láqueze', san ba bzachie' zra ca'an lawe' da nazrí'ine' bi chee' ca', bi ca' ba gucá'a Le'.

<sup>21</sup>'Lu zra na', che nu benne' dxe'e le'e: “Le na' xque, nigá zua Cristo”, u che nne': “Le na' xque, na' ze’”, quebe chéajle chee'. <sup>22</sup>Welelá' benne' xezezí xe'e, benne' xelune' lu'a Cristo, ne xelune' lu'a xel-la waca chee xabáa chee xezezí xe'e bi ca' ba gucá'a Dios che xezezéquene'. <sup>23</sup>Le sua le'e ban lazre'. Neda' ba gucha' le'e xúgute nédxute ca gaca na.

### Ca gaca gate xida Benne' Gulje' Bénneache

(Mt. 24.29-35, 42-44; Lc. 21.25-36)

<sup>24</sup>Nadxa gunná Jesús:

—Lu zra ca', gate te zra chee xel-la zi' caní, na' chul-la gubizra, ne québedxa gusení' beu'. <sup>25</sup>Belaj ca' xelexruj na zran xabáa, na' ca da zaj nalá' zaj ze tipa zran xabáa welezrízete na. <sup>26</sup>Ca nadxa xezele'ene' neda', Benne' Gulje' Bénneache, za'a lu beuj bza, napa' xel-la waca zren, ne da xabáa chia'. <sup>27</sup>Na' la sél-

latea' gubáz chee xabáa chia' ca' chee xuluchague' benne' ca' gunnía', benne' zaj zre'e dapa saca chee xezr la xu nigá, benne' zitu' zá'aca nila, zá'aca na'la.

<sup>28</sup>Le gusede ca naca da dxulé'e na ca naca chee xaga higo. Gate na' dxelexedxé'ene zruze na, ne zá'aca xrlegue na, na' ba nézele za beu' la. <sup>29</sup>Cá'anqueze, gate na' lé'ele ba dxelaca da caní, nézele ba zua gáguze zra cheajsé na, ne gácatē na.

<sup>30</sup>Da li dxapa' le'e, xúgute da caní gaca na nédxudxa ca xelate bēneache zaj zre'e lu zra na'. <sup>31</sup>Xabáa ne xezr la xu nigá wadé chee na. Xrtizra' nigá quebe te na ca'anze, san waca li na.

<sup>32</sup>'Ca naca chee zra na', ne chee beu' na' quegá nu neze bata gaca na. Quebe zaj neze gubáz chee xabáa, ne Zrí'inequeze Dios quebe nézene'. Tuze Xradxu Dios nézene'.

<sup>33</sup>'Chee le na', le sua le'e ban lazre'. Le guxúe, ne le guchálajle Dios lawe' da quebe nézele bátala zrin zra na'. <sup>34</sup>Gaca na ca guca chee tu benne' biu, benne' guz'éle zéajē' zitu'. Gate na' za dxúajē' xu'u, na' dxudéē' da nape' lu na' bi wen zrin chee' ca', ne dxunézruje' tu tube' zrin da xelunbe', ne dxusebague' benne' zē' dxa xu'u guxúe xánniē'. <sup>35</sup>Chee le na', le sua le'e ban lazre' lawe' da quebe nézele le'e bátala xelá' xrane xu'u, che dxe xrínneze, che dxela, che ca cuezre xjeaj, che che zílala, <sup>36</sup>ga gaze xelé'e chadí dute, na' cheajxraque' le'e dxásele. <sup>37</sup>Ca da dxennía', dxapa' le'e, dxapa' xúgute benne': ¡Le sua ban lazre'!

### Dxelexegá'anē' dizra' chee xelēl-le' Jesús

(Mt. 26.1-5; Lc. 22.1-2; Jn. 11.45-53)

**14** <sup>1</sup>Xechupa zra za zrin chee xelune' laní chee xulusá lazre' ca naca da ben Dios gate na' bebéajē' benne' Israel ca' lu xezr la xu Egipto, laní na' dxelawe' xeta xtila da quebe nachixre cua zichaj chee na. Na' benne' xíchajē ca' chee bxruze ca', ne benne' dxuluxuzájle'e da nadxixruj bea Dios belilaj lazre' ájala xelune' chee xelēl-le' Jesús bagácheze chee xelútiē' Le'. <sup>2</sup>Na' gulenné':

—Quegá gundxu na lu laní, chee quebe dxe'ena zraga bēneache.

### Tu nu'ula dxegüé'e da za zichaj Jesús

(Mt. 26.6-13; Jn. 12.1-8)

<sup>3</sup>Zua Jesús lu xezre Betania, lu lizre tu benne' le' Simón, benne' guzriē' wē' guzru'. Dxácatē zaj dxe'e dxelawe' na', na'

bzrin tu nu'ula nu'e tu da dau' da naca na xiaj xrtan da nazí le na alabastro, ne nazrate na da za da dxelá zixre chee xiaj nardo, da zácale'e na. Na' gulé'e da dau' na', ne blálaje' da za na' xichaj Jesús. <sup>4</sup>Bal-la benne' ca', benne' zaj zre'e na', belezré'e, na' gulenné', dxelé ljwezre':

—¿Bizr chee na' ben ditaj nu'ula nigá da za na'? <sup>5</sup>Waca ta'u da na' chee sídxadxu ca lázrujdxu chee tu iza, chee gácale dxu benne' xache' ca'. Na' guledil-le' nu'ula'.

<sup>6</sup>Na' Jesús guzre' le':

—Quebe xe le nu'ula nigá ca'. ¿Bizr chee na' dxunle le' zede? Ca naca da ben nu'ula nigá chia' neda' naca na da cháwele'e. <sup>7</sup>Benne' xache' ca' tu zrázqueze' ládujla le'e. Waca gunle benne' ca' chawe' gate dxaca lázrele, san neda' quegá tu súaleza' le'e. <sup>8</sup>Nu'ula nigá bene' ca da guzéquene', gulu'e da za bel-la' dxen chia' nédxula chee zra gate gachia' lu xedxu ba. <sup>9</sup>Da li dxapa' le'e, gáteteze na' gaca lban chee dizra' chawe' chia' lu xúgute xezre zaj nnita xezr la xu nigá, cá'anqueze zrálajqueze ca naca da ben nu'ula nigá, chee xulusá lazre' chee'.

**Judas dxexegá'ane' dizra' gudé' Jesús lu na' benne' ca' dxeledábague' Le'**

(Mt. 26.14-16; Lc. 22.3-6)

<sup>10</sup>Nadxa Judas Iscariote, tu benne' chazrinnu ca' dxusede Jesús, guxíaje' xeajchálajlene' benne' xíchaje' ca' chee bxruze ca' chee xelexegá'ane' dizra' ájala gune' gudé' Jesús lu na' benne' ca'. <sup>11</sup>Ca belén benne' ca' ca gunná Judas, gulebéle'ene', na' gulechebe lazre' xulunézruje' le' dumí. Nadxa Judas guzú lawe' dxexílaje' ájala gudé' Jesús lu na' benne' ca'.

**Da dxágudxu chee gusá lázredxu ca gute Jesús**

(Mt. 26.17-29; Lc. 22.7-23; Jn. 13.21-30; 1 Co. 11.23-26)

<sup>12</sup>Zra nedxu chee laní gate dxelawe' xeta xtila da quebe nachixre cua zichaj chee na, ne dxelutie' zríla'dau' chee Laní Pascua, gate na' dxulusá lazre' ca guca gate bebéaj Dios benne' Israel ca' lu xezr la xu Egipto, na' benne' ca' dxusede Jesús buluchebe' le':

—¿Gazra dxaca lazru' chéajntu' cheajcuézentu' da gágudxu Laní Pascua?

<sup>13</sup>Nadxa Jesús gusel-le' chupa benne' ca' dxusédene'. Dxe'e le':

—Le chjaca lu xezre Jerusalén, na' cheajxrácale tu benne' biu ze nu'e tu dx'e'e nisa. Le chjácálenē', <sup>14</sup>na' naga xexu'e, xe'e benne' xrane xu'u na': “Benne' Wesede cheedxu dxennē': ¿Gazra zua xu'u naga guna' Laní Pascua, chee gawa' tu zren nen benne' ca' dxusédeda'?” <sup>15</sup>Nadxa gulé'ene' le'e tu xu'u zren da naca na gudxupe' cuía sibe da bache nabeza na. Na' gucuzale da gágudxu.

<sup>16</sup>Nadxa benne' ca' dxusédene' belexedxúaje' gusá'aque', na' belezrine' xezre Jerusalén. Na' guca xúgute' ca da ba guzre Jesús le', na' bulucueze' da xelawe' lu Laní Pascua.

<sup>17</sup>Ca gula chizrela, na' bzrin Jesús nen benne' chazrinnu ca' dxusédene'. <sup>18</sup>Na' ca zaj dx'e'e dxelawe', na' gunná Jesús, dx'e'e le': —Da li dxapa' le'e, tu benne' ládujla le'e, benne' dxawe' tu zren nen neda', gudé'e' neda' lu na' benne' ca' dxeledábague' neda'.

<sup>19</sup>Nadxa benne' ca' gulezúa xácheze', ne gulezú lawe' dxuluchebe' Jesús tu tue':

—¿Neda' xca'?

Na' xetúe' cá'anqueze guzre' Le':

—¿Neda' xca'?

<sup>20</sup>Nadxa bechebe Jesús, dx'e'e le':

—Tu benne' ládujla le'e chazrinnule, benne' dxawe' tu zren nen neda' lu xé'ena nigá. <sup>21</sup>Da li gatia' neda', Benne' Gulje' Bénneache, ca da naxúaj na chia' lu xiche chee Dios. Baxache' naca chee benne' na' gudé'e' neda' lu na' benne' ca' dxeledábague' neda'. Cháwedxa gaca chee bénnea' la ca gúlaje'.

<sup>22</sup>Dxácatē zaj zre'e dxelawe', na' gucá'a Jesús xeta xtila, ne guzre' Dios: “Xcalenu'.” Ca gudé' bzúzruje' na, na' bnézruje' na chee benne' ca', ne guzre' le':

—Le gagu na. Da nigá dxulé'e na ca gaca chee bel-la' dxen chia'.

<sup>23</sup>Nadxa guqu'é'e tu da dxé'ajdxu, ne ca gudé' guzre' Dios: “Xcalenu'”, na' bnézruje' na benne' ca', na' xúgute' gulé'aje' late' weaj da na'. <sup>24</sup>Nadxa Jesús guzre' le':

—Da nigá zéaje na dxen chia' da dxucá'ana chawe na xel-la wezría cube. Dxen chia' nigá lalaj na ne chee benne' zan. <sup>25</sup>Da li dxapa' le'e, québedxa xí'aja' xrise uva caní ca zrindxa zra gate na' xí'aja' da cube naga dxenná bea Dios xabáa.

### **Dxulé'e Jesús nna Pedro quebe núnbe'e Jesús**

(Mt. 26.30-35; Lc. 22.31-34; Jn. 13.36-38)

<sup>26</sup>Ca gudé' belul-le' da gaca ba Dios, na' belegüene' lu Xi'a Xaga Olivo Ca'. <sup>27</sup>Nadxa gunná Jesús, dx'e'e le':

—Xúgutele le'e gusán lázrele neda' na'a xela lawe' da naxúaj na lu xiche chee Dios, dxenné': "Gutia' benne' dxuxúe' zrila' ca', na' zrila' ca' welase dínna'ba'." <sup>28</sup>Gate te xebana' lu xedxu ba, wexá'a neda' nédxula ca le'e naga nababa Galilea.

<sup>29</sup>Nadxa Pedro guzre' Jesús:

—Láqueze xúgute benne' caní xulusán lazre' Lue', neda' québequeze guna' ca'.

<sup>30</sup>Jesús guzre' le':

—Da li dxapa' lue', lu xela nigaze, nédxula ca za cuezre xjeaj chupa lasa, nnau' chunna lasa quebe núnbe'u neda'.

<sup>31</sup>Na' dxennáqueze Pedro na', gunné':

—Láqueze gatia' tu zren nen Lue', québequeze nnia' quebe núnbe'a Lue'.

Cá'anqueze gulenná xúgute'.

### Jesús dxuchálajlene' Dios tu lataj nazí le na Getsemaní

(Mt. 26.36-46; Lc. 22.39-46)

<sup>32</sup>Nadxa belezrine' tu lataj naga nazí le na Getsemaní, na' gunná Jesús, dxé'le benne' ca' dxusédené':

—Le cueza nigá dxácaté cha'a cheajchálajlena' Dios.

<sup>33</sup>Nadxa Jesús guché'le Pedro, ne Jacobo, ne Juan, na' guzú lau dxexúa xáche'le'e. <sup>34</sup>Na' dxé'le benne' ca', dxenné':

—Ba dxunte na watia' lawe' da zua xáche'le'a. Le xegá'ana le'e nigá, ne le sua ban lazre'.

<sup>35</sup>Nadxa Jesús guz'é'le zéaje' xelate' ca na'la, na' guzúe' sudxú'ala, gunabe' Dios che gaca, quebe té'e' xel-la zi' ca da dxal-la' saque' lu zra na'. <sup>36</sup>Ca dxuchálajlene' Dios na', gunné':

—Xrae, xúgute wazéquenu' Lue'. Bselá neda' chee quebe saca zi'a lu da caní. Quebe gaca ca dxaca lázreza' neda', san ca dxaca lazru' Lue' gaca na.

<sup>37</sup>Nadxa bezrine' naga zaj zra' benne' ca'an dxusédené', ne xeajxraque' le' dxelásie'. Na' Jesús guzre' Pedro:

—Simón, ¿dxásequezu' nigá? ¿Quebe guzéquenu' gusebán lazru' tu chí'idau'ze? <sup>38</sup>Le sua ban lazre', ne le guchálajle Dios chee quebe gun zréaje da xriwe' le'e. Da li, lu xichaj lázrdaule dxaca lázrele gunle da xrlátaje, san lu belá' dxen cheele dxate ni'a na'le.

<sup>39</sup>Nadxa Jesús guxíaje' da xula zeajchálajlene' Dios, na' tuze ca dxenné'. <sup>40</sup>Nadxa ca bezrine', xecha lasa xeajxraque' benne' ca'an dxusédené', dxelásie' lawe' da xu'u bchigala

xiaj lawe'. Benne' caní quebe belexezrela lazre' bi xelé'e Le'.  
 41 Na' ca bezrín Jesús da guxunne' lasa, na' guzre' benne' ca':

—¡Le gase na'a, ne le xezí' lázre'! ¡Bache na! ¡Ba bzrin zra tea' neda', Benne' Gulje' Bénneache, lu na' benne' dul-la ca'!  
 42 ¡Le chasa! ¡Le chu'u na'a! ¡Ba za benne' gudé'e neda' lu na' benne' ca' dxeledábage' neda'!

### Dxelel-le' Jesús

(Mt. 26.47-56; Lc. 22.47-53; Jn. 18.2-11)

43 Dxácate dxuchalaj Jesús caní, na' bzrin Judas, tu benne' nabábalene' benne' chazrinu ca' dxusede Jesús, na' zjácale benne' zan le', zaj nu'e xia nalá, ne xaga ca'. Zaj naque' benne' gulesel-la benne' xíchaje ca' chee bxruze ca', ne benne' ca' dxuluxuzájl'e da nadxixruj bea Dios, ne benne' gula sina ca'. 44 Judas, benne' dxudé'e Jesús lu na' benne' ca' dxeledábage' Le', ba blé'ene' benne' ca' tu da gun'e da gaca bea na nule' naca Jesús, gunné':

—Bénnea' gunupa', benne' na' quél-lale. Le xeché'e, ne le guxúe xanne' chee quebe xelé'.

45 Na' ca bzrine' na', gubigu'e lau Jesús, ne dxe'e Le':

—Benne' Wesede.

Na' bnupe' Le'. 46 Nadxa benne' ca' gulel-le' Jesús, ne belexeché'e Le' ba nadxéaje'.

47 Tu benne' dxune' Jesús tu zren guléaje' xia nalá chee', na' guchuge' naga tu bi wen zrin chee bxruze blau. 48 Nadxa Jesús guzre' benne' ca':

—¿Bdxuajle le'e zale nen xia nalá, ne xaga ca' chee quél-lale neda', dxugúnele neda' ca tu benne' gubán? 49 Xúgute zra guzúa' neda' ládujla le'e dxusédeda' le'e lu xudau', na' cabata' gudél-lale neda'. Da nigá dxaca na chee gaca li ca da naxúaj na lu xiche chee Dios.

50 Nadxa xúgute benne' ca' dxusede Jesús bulusán lazre' Le'. Buluzrúnnuje'.

### Dxuzrunnuj tu bi cuide'

51 Tu bi cuide', bi zéajlebe' Jesús, ne nácube' tu ladxe' laga, gulel-la benne' ca' lebe'. 52 Na' bsanbe' ladxe' laga da nácube', na' bzrúnnujbe' gala xídezebe'.



**Dxezrín Jesús lau benne' ca' chee xu'u lawe' blau chee judío ca'**  
(Mt. 26.57-68; Lc. 22.54-55, 63-71; Jn. 18.12-14, 19-24)

<sup>53</sup>Nadxa beleché'e Jesús lau bxruze blau, na' belezraga xúgute benne' xíchaje ca' chee bxruze ca' ga na', ne benne' gula sina ca', ne benne' ca' dxuluxuzájle'e da nadxixruj bea Dios. <sup>54</sup>Pedro nawe' Jesús zítu'la, na' bzrine' chale'aj chee lizre bxruze blau, naga begá'ane' tu zren nen zruza ni'a na' benne' xu'u lawe' ca', dxuluxuché'e dxu'a xi'.

<sup>55</sup>Na' bxruze blau, ne xúgute benne' chee xu'u lawe' blau chee judío ca' gulíl-laje' tu da gagu na zria Jesús chee xezezéquene' xuluzría xi'e Le' chee gatie', na' quebe bi belezrélene'. <sup>56</sup>Benne' zante belún lazre' chee Jesús. Quebe bedxúaj dizra' chee' tuze ca dxelenné' tue' ne xetúe'. <sup>57</sup>Bal-le' belase', na' gulagu zría Jesús da wen lazre', dxelenné':

<sup>58</sup>—Netu' ba bémentu' chee', gunné': “Neda' guchínnaja' xudau' nigá da belún bénneache, na' ca gaca chunna zra xechisa' xetú xudau' da quebe xelún bénneache.”

<sup>59</sup>Cá'anqueze quebe butil-le ca da dxelenné'.

<sup>60</sup>Nadxa bxruze blau guxase' ládujla xúgute benne' ca', na' bchebe' Jesús:

—¿Québequeze bi dizra' dxuxuzri'u Lue'? ¿Bizra da nigá dxelenné' chiu' Lue'?

<sup>61</sup>Jesús guzúe' zrize, ne gútuqueze bi dizra' buzri'e. Na' bxruze blau bchebe' Le' xecha lasa, dxenné':

—¿Nacu' Lue' Cristo, Zri'ine Dios Lá'azxa?

<sup>62</sup>Na' gunná Jesús, dx'e'e le':

—Awe', ca' naca'. Walé'ele neda', Benne' Gulje' Bénneache, dx'e'a chalá'a xabela chee Dios, nape' dute xel-la waca. Walé'ele neda' zezá'a lu beuj bza.

<sup>63</sup>Nadxa bxruze blau gucheze' zra lane', na' gunné':

—¿Núzradxa nachínedxu benne' xelagu zria Le'? <sup>64</sup>Le'e bache bénquezle ca dxenné' schanni' chee Dios. ¿Bi dxennale le'e xca'?

Xúgute benne' ca' gulenné':

—Nabía xi'e dxal-la gatie'.

<sup>65</sup>Nadxa bal-la benne' ca' gulezú lawe' dxuluzré'e Le' zrene', na' bulucache' lau Jesús, ne buluzálaje' Le'. Dxelenné':

—Gunné' xa'a nuzra dxue Lue'.

Na' benne' zruza ni'a na' benne' xu'u lawe' belú'e lau Jesús.

### Dxenná Pedro quebe núnbe'e Jesús

(Mt. 26.69-75; Lc. 22.56-62; Jn. 18.15-18, 25-27)

<sup>66</sup>Pedro guzúe' lu chale'aj zrila, na' bzrin tu nu'ula wen zrin chee bxruze blau, <sup>67</sup>na' ca ble'ebe' Pedro dx'e'e dxu'a xi dxuxuché'e, na' gunná'abe' le', ne gúzrebe' le':

—Lue' dxedálequezu' Jesús, benne' Nazaret na'.

<sup>68</sup>Na' bechebe Pedro, dxenné':

—Quebe núnbe'a bénnea', ne quebe nezda' nu chee na' dxuchálaju'.

Na' bedxúaj Pedro chale'aj naga dxelu'e. Nadxa gudxezre xjeaj. <sup>69</sup>Nadxa nu'ula wen zrin chee bxruze blau na' gunná'abe' Pedro xecha lasa, na' gunabe', dx'e'ebe' benne' ca' zaj zre'e na':

—Benne' nigá naque' tuze benne' ca'an.

<sup>70</sup>Pedro xecha lasa bzué' Jesús chalá'ala. Xetú chí'idau' benne' ca' zaj zre'e na' gulé'e Pedro xecha lasa:

—Da líqueze lue' nacu' tuze benne' ca'an lawe' da nacu' benne' chee xezre ca' zaj nababa Galilea. Ca dxuchálaju' naca bea na da na'.

<sup>71</sup>Nadxa Pedro guzú lawe' dxuzría xi' cuine', ne ben chúchue' xrtizre', gunné':

—Quebe núnbe'a bénnea' dxennale le'e ca'.

<sup>72</sup>Ca'an guca, gudxezre xjeaj da gudxupe' lasa. Nadxa Pedro xeajsá lazre' ca da guzre Jesús le', gunné': “Nédxudxa ca za cuezre xjeaj chupa lasa, lue' nnau' chunna lasa quebe núnbe'u neda'.” Na' ca xeajsá lazre' da nigá, gudxézrele'e.

### Dxezrín Jesús lau Pilato

(Mt. 27.1-2, 11-14; Lc. 23.1-5; Jn. 18.28-38)

**15** <sup>1</sup>Ca guxaní' che zila, na' benne' xíchaje ca' chee bxruze ca' belexedupe' nen benne' gula sina ca', ne benne' ca' dxuluxuzájle'e da nadxixruj bea Dios, ne xúgute benne' chee xu'u lawe' blau chee judío ca'. Guleché'e Jesús nadxéaje', na' buludée' Le' lu na' Pilato. <sup>2</sup>Pilato gunábene' Jesús:

—¿Nacu' Lue' wenná bea chee judío ca'?

Na' bechebe Jesús:

—Ca' naca na, ca ba gunnáu' lue'.

<sup>3</sup>Na' benne' xíchaje ca' chee bxruze ca' gulawe' zria Jesús da zante. <sup>4</sup>Nadxa Pilato gunábene' Jesús xecha lasa:

—¿Quebe bi dizra' dxuzri'u? Gunná'xque ca da zánete da dxelawe' zria Lue'.

<sup>5</sup>Jesús quebe bi dizra' ca buzri'e. Ca' guca, bebánele'e Pilato.

### **Dxelichaj be'e gate Jesús**

(Mt. 27.15-31; Lc. 23.13-25; Jn. 18.38—19.16)

<sup>6</sup>Pilato zua tu da dxúnqueze' tu iza tu iza gate dxaca Laní Pascua. Dxusane' tu benne' xu'e lizre xia, núteteze benne' xelenaba bénneache ca' le'. <sup>7</sup>Lu xu'u lizre xia na' xu'u tu benne' le' Barrabás, benne' nune' tu zren benne' ca' belutié' benne' ca', gate na' gudíl-lalene' benne' Roma ca'. <sup>8</sup>Na' belezrín lau Pilato benne' xezre ca', ne gulezú lawe' dxelenabe' lau Pilato gune' ca dxúnqueze'. <sup>9</sup>Na' bechebe Pilato:

—¿Dxaca lázrele le'e gusana' bénnea' naque' wenná bea chee judío ca'?

<sup>10</sup>Caní gunná Pilato lawe' da dxeque be'ene' buludé' benne' xíchaje ca' chee bxruze ca' Jesús lu ne'e lawe' da dxelaque' zre'e lazre' Le'. <sup>11</sup>Na' benne' xíchaje ca' chee bxruze ca' beleché'e benne' xezre ca', ne gulegú'u xel-le' le' chee xelexenabe' lau Pilato gusané' Barrabás. <sup>12</sup>Nadxa Pilato gunábene' benne' ca':

—¿Bi dxaca lázrele le'e guna' chee bénnea' naque' wenná bea chee judío ca'?

<sup>13</sup>Nadxa belexechebe', gulenné' zizraj:

—Bde'e xaga béguaj.

<sup>14</sup>Na' Pilato bchebe' benne' ca':

—¿Bizra da calela nun benne'?

Xecha lasa gulenné' zizraj:

—Bde'e xaga béguaj.

<sup>15</sup>Nadxa Pilato bsane' Barrabás lawe' da dxaca lazre' xegá'ane' chawe' nen benne' xezre ca'. Na' ca' gudé na' bsebage' benne' ca' xeline' Jesús tu xide, na' bdee' Le' lu na' benne' ca' chee xuludé'e Le' xaga béguaj.

<sup>16</sup>Nadxa benne' dxjaque' wedil-la guleché'e Jesús lu chale'aj xu'u lawe', na' bulutupe' xúgute ljwezre' benne' dxjaque' wedil-la lataj na'. <sup>17</sup>Na' bulugácué' Jesús tu ladxe' bzawe, ne buluzrié' xíchaje' tu da zaj nune' nen zruze xaga xече'. <sup>18</sup>Nadxa gulezú lawe' dxelenné' zizraj:

—¿Gaca ba wenná bea chee judío ca'!

<sup>19</sup>Na' belú'e xichaj Jesús nen tu xia xtila, ne buluzré'e Le' zrene'. Na' buluzú zribe' lawe', dxelape' Le' ba lá'ana. <sup>20</sup>Ca gudé bulucá'ana dítaje' Le' caní, na' belexegu'e ladxe' bzawe, na' buluxugácu'e Le' zra lá'anaqueze'. Nadxa belexebéaje' Le' chee chjaque' naga xuludé'e Le' xaga béguaj.

### **Dxuludé'e Jesús xaga béguaj**

(Mt. 27.32-44; Lc. 23.26-43; Jn. 19.17-27)

<sup>21</sup>Tu benne' chee xezre Cirene le' Simón, xra Alejandro, ne Rufo, zezé'e le'e xixre', na' ca bedé'e na', na' bulusebague' le' gu'e xaga béguaj chee Jesús.

<sup>22</sup>Guleché'e Jesús tu lataj nazí le na Gólgota, da zéaje na "Lataj Chee Zrita Xichaj Benne' Gate." <sup>23</sup>Nadxa bulunézruje' Jesús xrise uva wal-la da nachixre da sla' chee mirra. Jesús quebe gu'e na. <sup>24</sup>Nadxa buludé'e Le' xaga béguaj, na' benne' dxjaque' wedil-la gulebéaje' da gulé'e na nule' xelexale' zra lana Jesús, na' bila xelexúa tu tue'.

<sup>25</sup>Guca che zílala gate na' buludé'e Jesús xaga béguaj. <sup>26</sup>Buludé'e da naxúaj xichaj xaga béguaj chee Jesús da dxulé'e na da nabague', da naxúaj na caní: "Wená Bea Chee Judío Ca'." <sup>27</sup>Cuita Jesús buludé'e le'e xaga béguaj ca' chupa benne' gubán, tue' chalá'a xabéla chee', ne xetúe' chalá'a xéglala chee'. <sup>28</sup>Ca'an guca, guca li ca da naxúaj na lu xiche chee Dios naga dxenné' caní: "Buluzue' Le' tu zren nen benne' wen da zrinnaj ca'."

<sup>29</sup>Na' benne' dxeledé'e na' gulenné' schanni' chee Jesús, ne buluté' xíchaje', dxelenné':

—Awe'. Guchínajaj! Lue' xudau' cheentu', na' gate gaca chunna zra, na' xechisu' na. <sup>30</sup>Bselá cuinu' na'a, ne bexetaj le'e xaga béguaj na'.

<sup>31</sup>Cá'anqueze belún benne' xíchaje' ca' chee bxruze ca', ne benne' dxuluxuzájle'e da nadxixruj bea Dios. Belún le' chee Jesús, dxelé' ljwezre':

—Benne' xula bselá benne, san Le' québequeze dxezéquene' guselá cuine'. <sup>32</sup>Lue', Cristo, wená bea chee benne' Israel, bexetaj le'e xaga béguaj na' chee le'entu', na' chéajlentu' chiu'.

Cá'anqueze belún benne' ca' zaj de'e le'e xaga béguaj ca' tu zren nen Jesús, gulenné' schanni' chee'.

### **Dxate Jesús**

(Mt. 27.45-56; Lc. 23.44-49; Jn. 19.28-30)

<sup>33</sup>Ca bzin wagubizra, na' guchul-la dute lu xezr la xu nigá tu chi'i wal-la gula. <sup>34</sup>Ca gudé na', na' gunná Jesús zizraj:

—Eloi, Eloi, ¿lama sabactani?

Da nigá zéaje na: “Dios chia!, Dios chia!, ¿bizr chee na' nusanu' neda?”

<sup>35</sup>Bal-la benne' ca' zaj zre\_e na' belenne' na, na' gulenné':

—Le xene. Dxenné' Elías, bénnea' bchálaje' waláz chee Dios.

<sup>36</sup>Nadxa tu benne' guzá chégüe', na' xeajlá'awaje' lu xrise uva zichaj tu da dxezrupe na nisa, na' bzue' na lawe' tu xia xtila da bcuene' dxu'a Jesús chee xi'aje', na' gunná benne' nigá:

—Cuézadxu. Guxúexquedxu che wida Elías chee xulétaje' Le'.

<sup>37</sup>Nadxa Jesús gudxezre xe'e, na' gútete'. <sup>38</sup>Ca ná'queze gudxeza ladxe' da ze lu xudau', guca na chúpala. Gucá'a na dxa'la, bedxúajte na zri'la. <sup>39</sup>Na' benne' dxenná be'e lu wedil-la, benne' ze' lau Jesús, gate na' blé'ene' ca gudxezre xe'e, ne ca guca gútete', na' gunné':

—Da líqueze benne' nigá guque' Zri'ine Dios.

<sup>40</sup>Cá'anqueze zaj ze na' bal-la nu'ula dxelenné'e zítu'la. Ládujla nu'ula caní zaj ze María Magdalena, ne Salomé, ne María, xrna Jacobo cuide' ne José. <sup>41</sup>Nu'ula caní gusá'acalene' Jesús, ne gulácalene' Le' gate na' gudé' naga nababa Galilea. Cá'anqueze zaj ze na' zánedxa nu'ula xula, nu'ula ca' belezrine' Jerusalén tu zren nen Jesús.

### **Dxulucache' Jesús lu xedxu ba**

(Mt. 27.57-61; Lc. 23.50-56; Jn. 19.38-42)

<sup>42-43</sup>Ca za chizrela bzrin José, benne' Arimatea ga na'. Benne' nigá naque' benne' blau ládujla benne' ca' chee xu'u lawe' blau chee judío ca'. Cá'anqueze le' dxebeze' zra la' Dios chee nna be'e. Lawe' da naca zra dxulucueze', zra nedxu chee zra dxulupáne', du lazre' guxú'e lau Pilato, na' gunabe' si'e lataj xexu'e Jesús. <sup>44</sup>Bebánele'e Pilato ca bénnene' ba gute Jesús, na' gunné' benne' dxenná be'e lu wedil-la na' chee gunabe' che ba guca ca'. <sup>45</sup>Gate bénnea' dxenná be'e lu wedil-la gunné' ca'an guca, nadxa Pilato bnézruje' José lataj bexu'e Jesús. <sup>46</sup>Nadxa José guzi'e tu ladxe' xtila laga, na' bulétaje' Jesús, ne bulazre' Le' ladxe' xtila na'. Na' gúxrue' Jesús tu lu ba da ba gudene' le'e xiaj xre, na' bsézxuje' ba na' nen tu xiaj zren. <sup>47</sup>María Magdalena, ne María, xrna José belelé'equezne' naga bulucache' Jesús.

### Dxexebán Jesús ládujla benne' gate

(Mt. 28.1-10; Lc. 24.1-12; Jn. 20.1-10)

**16** <sup>1</sup>Ca gudé zra dxulupá'ane', na' María Magdalena, ne Salomé, ne María, xrna Jacobo, gulez'íe da dxelá zixre chee cheajlelu'e Jesús. <sup>2</sup>Na' bál-la'la zra nedxu chee da gazre zra belezrine' dxu'a ba gate na' za dxalaj gubizra. <sup>3</sup>Na' gulenné', dxelé' ljwezre':

—¿Nuzra cua xiaj da naxexxuj ba?

<sup>4</sup>Ca gulenné'e, na' belelé'ene' xiaj zren na' da buluséxxuje' ba, ba nadúa na. <sup>5</sup>Ca gulu'e lu ba, na' belelé'ene' tu benne' dxe'e chalá'a xabela, nácu'e' zra lane' tunna da chiche, na' belezrebe'. <sup>6</sup>Na' gunná benne' nigá, dxe'e nu'ula ca':

—Quebe zrēbele. Le'e dxexílajle Jesús, benne' Nazaret, bēneea' gudé'e le'e xaga béguaj. Bache bebán bēneea'. Québedxa xu'e nigá. Le nna' lataj naga gulexru'e' Le'. <sup>7</sup>Le chjaca na'a, le cheajezre benne' ca' bsédene', ne Pedro cuía lau Jesús chéaje' naga nababa Galilea ca le'e. Na' xelé'equezle Le' ca ba gunnáqueze'.

<sup>8</sup>Nadxa nu'ula ca' buluzrúnnuje', besí'aque' dxu'a ba lawe' da belezrébele'e. Quebe nu gulé'queze' ca da guca na lawe' da dxeleze'bele'e.

### Jesús dxulé'e lau María Magdalena

(Jn. 20.11-18)

<sup>9</sup>Ca gudé bebán Jesús ládujla benne' gate ca guxaní' zra nedxu chee da gazre zra, na' ble'e lawe' zate ca' María Magdalena, nu'ula na' bebéaj Jesús gazre be' xriwe' guxú'e. <sup>10</sup>Nu'ula nigá guxíaje' xeajezre' benne' ca' gulaque' Jesús tuze, zaj zre'e baxácheze, ne dxelebezre'. <sup>11</sup>Gate na' gulenne' nabán Jesús, na' ba ble'e nu'ula nigá Le', quebe guláajle'e.

### Dxulé'e lau Jesús chupa benne' bsédene'

(Lc. 24.13-35)

<sup>12</sup>Ca gudé na' ble'e lau Jesús nazrala chupa benne' ca' bsédene' zaj xu'e neza le'e xixre'. <sup>13</sup>Benne' caní belexebi'e, na' xeajleguezre' benne' xezícala. Cá'anqueze benne' caní quebe guláajle'e.

### Jesús dxusebague' benne' gubáz chee' ca' da dxal-la' xelune'

(Mt. 28.16-20; Lc. 24.36-49; Jn. 20.19-23)

<sup>14</sup>Ca gudédxa, na' ble'e lau Jesús chinéaj benne' ca' bsédene' ca zaj dxe'e dxelawe', na' gudil-le' le' lawe' da quebe

guléajle'e ba bebane', ne lawe' da zaj naque' lázrdau zide' lawe' da quebe guléajle'e chee benne' ca' belexelé'ene' Le' ca gudé bebane'. <sup>15</sup>Na' gunné', dxé'e benne' ca':

—Le chjaca du ca naca xezr la xu. Le cu'u lban chee dizra' chawe' chia' chee xelénqueze xúgute bénneache. <sup>16</sup>Benne' chéajle'e, ne chue' nisa, la bénnea', na' benne' quebe chéajle'e, wabía xi' bénnea'. <sup>17</sup>Da dxelunna bea caní xululé'e benne' ca' xeléajle'e chia', xuluchínene' La neda' chee xelexebéaje' be' xriwe'. Xuluchálaje' dizra' nazrala. <sup>18</sup>Welúxrue' belá' ca', ne che xelé'aje' da gute benne', quebe bi xeléquene'. Cá'anqueze wuluxrúa ne'e benne' quebe chawe' zaj zué', na' xelexexaque'.

### **Dxexepe Jesús xabáa**

*(Lc. 24.50-53)*

<sup>19</sup>Ca gudé bchálaj Xránadxu Jesús nen benne' ca', na' Dios bechise' Le' xabáa, na' gudxé'e chalá'a xabela chee Dios. <sup>20</sup>Nadxa benne' ca' guledxúaje', xejlelu'e lban chee dizra' chawe' nigá du ca naca xezr la xu nigá. Léqueze Xránadxu gúcalene' le', na' bdxixruj be'e dizra' chee' ne chee xel-la waca ca' da za xabáa da belune'. ¡Ca'an gaca na!